

# HEBREO IMÁCIMO CUEGABE

(Daa bimaci jíáifodo mameina Judíuui)

La Carta a los Hebreos

**Juzíñamui ie Jitodo ja comínimo úrite**

**1** <sup>1</sup> Jaiái ninomo cai judíuui jaiáidigimamo Juzíñamui úrite. Ua, ie uai llórainido diga icaiño, diga jíáifodo jóoide uáillaído úrite. <sup>2</sup> Mei íadi ja birui íirairuillaído Juzíñamui ie Jitodo caímo úrite. Bie Jitó uaido Juzíñamui jaiái bie éniena naa úcuairi finode. Iemo naga raa íeiena náamatallena Juzíñamui íena mamede. <sup>3</sup> Afe Jitó ie Moomo ite ebíredena jino ciotatímie. Daje llezica afémie jino náiraimo ciotaga; ua daje Juzíñamui izóidímie. Nana finoca ráaniaina afémie dájena jaináitano ie ñue riírede uáillaído nágarui ñue jaícina finócana uite. Bímie, cruzmo dama ie die tótajado cai fiénidífuiai ñue múñua mei, caífo monamo ite Juzíñamui nabezi dibénemo ráinazaide, dinómona nahí illáimaillena.

**Juzíñamui Jitó Juzíñamui abi imáciai baimo fígomie**

<sup>4</sup> Afémie afe jamánomo riíredinomo jáillamona, nana Juzíñamui abi imáciai baimo fígomiena jaide. <sup>5</sup> Juzíñamui ie abi imácimona dáamie jaca “Cue jitódio” daíñede. Ua, “Cue Jitódio, ja birui illáimana o jóoneiticue” jaca daje izói íaioina daíñede. Mei íadi ie Jitó Jesucrístona daí daide. Daje izói ie abi imácimona dáamienda “O moona íiticue” daíñede. Dáonomo “Cue jitóitio” daíñede. Mei íadi Jesuna daí daide. <sup>6</sup> Ua Juzíñamui ie izoide daade Jitona bie éniemo comuítajano daide:

Mai, nana Juzíñamui abi imaci, bie cue jitona jacíruioicana ñue omoi íóbitari.

<sup>7</sup> Mei íadi abi imácina Juzíñamui daide:

Bimaci cue abi canórainina íllamona, íaioina ocuífiredicue. Iemona jairifo raire náidacailla izói, bimaci cue ocuícana raire jetáfirediaioi. Afe izói nana cue canófirede cue abi imaci jacírede boode iraiçi izói, íaioina ocuífiredicue, —daide.

<sup>8</sup> Mei jíáifodo ie Jitona daide:

Juzíñamui o íllamona, o illáimana illirui jaca ninomo zíñona íite.  
Ñue comécina jaícina nafuedo jaca illáimaifireitio.

<sup>9</sup> Ua, comécina jaícina nafuena izírutio, mei íadi fiénidifuaímo  
éaicana eróidío.

Iemona Juzíñamui, ua o Juzíñamui, jae ona ióbitade.

Nana Juzíñamui uaina jíeruite o nabáñiaí cáimadua baímo,  
cáimatagao, —daide.

<sup>10</sup> Jíáinomo ie Jitona Juzíñamui daide:

O Ocuíraimadio.

Naga ráaniaí o táinia mei, bie énie finódío.

Nana monamo ite naga úcuai o ónoído finócano.

<sup>11</sup> Afe énie naa úcuairi niné táinocaitiaí, mei íadi o jaca zíñona íitio.  
Aféniaí jácara iníroillai zabilla izóí zábitiaí.

<sup>12</sup> Iemo inícuíro dócoiano oni jóonia izóí, oni eneno íaioina jóoneitio.  
Iemona iníroí jíáiroina abímo jita izóí, bñie naa ucúduairi  
méidoficaitiaí.

Mei íadi o jaca méidoñellioza, dinó nñmieitio.

Omo itifue jaca zíñona íite.

<sup>13</sup> ¿Ñíie mei ie abí ímiemo Juzíñamui llogámie:

O fairíconí o anamo cue anáfenotalle llezica mai benó cue nabézimo  
illaima nabai izóí ráinazaíbi?

Daíí dainámiena íñede. Dama ie Jitó Jesuna daíí daide. <sup>14</sup> Nana afe  
Juzíñamui abí imaci Juzíñamui ocuica canófirede jóriaiaí. Ua Juzíñamui  
orécaiaí, afémiedo jíllaitino ñue rairuíllena.

### Cristo caímo lluaíbiga jíllona uaimo ñue úíñoredicaí

**2** <sup>1</sup> Ie jira Juzíñamui Jitó, Jesucristo daíí naga illaima baímo  
jáidimiena íllamona, nana Juzíñamuimona cai cacana uaillai jeire  
cai olle iere jítaírede; omoi jefóniaí ñue jinéoiri. Aféuaimo ñue omoi  
cacáreiri, oni nibéfodo fiénidifuemo cai báíñeillena.

<sup>2</sup> Mei Juzíñamui jaiaí ie abí imácido llogáuai jaca oni caitánide. Naga  
aféuaina jeire oñédino naa cacáñidinori raire iere duere finócaiaí. Mei afe  
fiénidifue fñuamona Juzíñamui íaioímo jaícina íbana ote. <sup>3</sup> Mei íadi birui  
aféuai baímo jamánomo ñue ríírede uaina cacáñinodicaí. Ie jira bie Crístoni  
cai cacana uáíllaina jeire cai óñenia, ¿ñíífuédo jaícina íba uáíuemoni jíllaiticaí?  
¡Jíllonidicaí! Afe baímo ñue ríírede uai nano fueñe Ocuíraíma Jesucristo caímo  
llogáuai. Ie mei ie dáinana cacáñinodo aféuai jae cai uafue daííllena llotátaga.

<sup>4</sup> Afe íaioí daina uaimo onótate raado Juzíñamui ñue uai nabáitate. Iemo  
jíaí jacírede raado, aillo cíórainina raa díga afémie ñue uai nabáitate, íaioí  
daináuaimo ñue cai fñollena. Afe llezica Juzíñamui ie jítaínafue izóí, ie Ñuera  
Joreño nñefuaí finolle rñino, illa dígamierie íaioímo fecade, daje izóí caímo.

**Jesucristo Juzíñamui Jitó íadi afémie cai illa izói, fia cómena íficaide**

<sup>5</sup> Cai úrifirena ñuera úreitiruillaido ñíimie illáimaillena, Juzíñamui ie abi imácina: “Illáinina jáitiomoi” daíñede. <sup>6</sup> Mei jiáifodo comínina illáimaitaacade. Jaiiai Juzíñamui Cuegáuaimo David Juzíñamuina daide:

íNii naga come Juzíñamui dibénedo jamáimiiaina!

¿Ñibái mei íaioimo coméciidio?

¿Ñibái mei íaioi jitótiaimo járitaitio?

<sup>7</sup> Mei uáfueña due jiza o abi imaci jofófememo comínina comúitatio.

Illaima ebírenano naa ñúefue diga íaioimo nitáidio.

<sup>8</sup> Naga raa íaioi anamo o itátatio.

Daí naga raa iima anamo itábicaillamona, jae minica ie anamo itábicaíñedena iñede. Mei íadi ja birui iima dibénedo naga raana náamatañega. Afe izóiñedeza; afémie nahí náamañede. <sup>9</sup> Mei íadi jiáifodo birui Jesuna cai onónamona íemo coméciidicai. Afémie nana íanori due jiza Juzíñamui abi imaci jofófememo jónegamie. Aféruido afe Jesús nano cai jiáinona, tiilla onóillena facade; mei afe llezica nana comini fiénidífue ícoinia Juzíñamui zóofegamieza. Ie mei tiide meine abido cáanamona jamánomoidimiena jaide. Afe mei afémie, illaima izói, ñúefueña nitácamié, jae ebire finócamie, mei nauí ie tíllaruimo iere duere ie zefuállamona. Juzíñamui caíri dúecaillano, nana comini niné táinocaitañellena cai ícoinia Jesuna daíí zefuítate.

<sup>10</sup> Juzíñamui daíí ie Jitó duere finoille caimare íemo jóbide. Ie jira Juzíñamui íaioina jíllotaite ífódimie duere zefuállafuedo nana cai jíllonafueña ñue fuitade. Mei jii, naga raa Juzíñamui íeiena ie ínuamona ja birui itíaioi. Afémie nana comínimona aillo jitótiai jíllocade ie caimare ebírenanomo dáanommo íaioi dúcizaillena. <sup>11</sup> Mei Juzíñamui dibénemo oni jóonetimie Jesús, nana Juzíñamui dibénemo oni jónegamací diga daje Juzíñamuina móorediaioi. Iemona, cai baímo jamánomoidimie íadi, Jesús “Cue ámatiaídiomoi” daíí daínana meáiruñede. <sup>12</sup> Afémie Juzíñamuina daide:

O mámece cue ámatiaímo jino llóitícue.

Nana omo gairídino cígiri rocana ñúefue omo nítaitícue.

<sup>13</sup> Jiáínommo Cuegáuaimo daide:

Cue Juzíñamuidio. Omo ínoitícue.

Ie mei jiáínommo daide:

Be, benó itícue, Juzíñamui cuemo iga naa úruiaíri.

<sup>14</sup> Onódiommoiza, nana cai jae cómena comúitagacai. Daíí cai íllamona, daje izói Jesús dama cómena comúibicaide. (Ua, fia come izói jéiciga.) Afe mei come abi íemo íllamona, ie tíllado cai títaite Taífena ríinitade.

<sup>15</sup> Jaiáimona nana tiille jágiedo Taífemmo rairuícamacidicai. Mei íadi Jesús jae cai jacíruíñeillena nane ñue cai finode. Ja ráiruíñeganona afémie daíí

cai ñue orede, nana nauí cai caana llezica tíllena jacíruiticai íadi. <sup>16</sup>Mei uáfodo onóigaza: Jesús ie bíllado Juzíñamui abi imácina cánuaibiñe deza, mei íadi cómena íficaillano nana Abrahámona comuídigimana cánuaibite naa jíaie Juzíñamuimo ínotinori. <sup>17</sup>Afémie cai cánuaibillemona ie ámatiai nana íaioi illa izói afémie íficaillana iere jítáiredeza, mei dúecaifirede nahí comínimona Juzíñamuimo comínido úritillaimana jáideza. Ua ínofirega Juzíñamuimo úriraimana jáiacade, afe daíí ie tíllado comínimo ite fíenidífuiai oni muíñóllena. <sup>18</sup>Mei Jesucristo íaifue fieni facátafuaimona duere zefuide, aféfuemo baiñede íadi; íemona ja birui fieni Taife facátagamacina cánua ríino Crístomo íteza, ja caina ñue canórede.

### Jesús Moisés baimo jamánomoidimie

**3** <sup>1</sup>Ie jira, cue ñue ámatiai, Juzíñamui uáidogamací díbénemo jaináidimoiza, Jesumo izire comecí omoi facari; ua cai jeire oga ñúefue lluaíbitagamiemo ñue comecí omoi facari. Iemo nane Juzíñamui díbénemo caído ñue úritimiemo, mai íemo comecí omoi facari. <sup>2</sup>Bie Jesús íena daíí mamédimie ocuica uaina jaca nágaruillaí ínofirede; ua, jaiáidimie Moisés nana íemo llogáuaina jeire ófirena izói, afe izói bímie nana íemo ocuica uaina jeire ófirede. <sup>3,4</sup>Jae onóidimoiza naga jofo come niga; dama abina niñe deza. Mei íadi naga ráaniai fínódimie Juzíñamui. Iemo daje izói ja onóidimoiza, naga jofo niraíma afe nigaco baimo ñúemieza. Afémiemo jamánomo ñúefue jónere de. Ie izói afe bie Jesús Moisés baimo ñúefuena nitáregamie, mei naga raa afémie comuítagaza; íemo jíaí daje izói Juzíñamuimo cai jainánana Jesús comuítateza. <sup>5</sup>Ua, afe Moisés nana Juzíñamui íemo llogáuai, Juzíñamui díbénemo táijiacadimie izói, aféuaina ñue jaícina Juzíñamui eneno nizeca Israel náiraímo llotátate. Afe daíí afémie ie méifodo bite llófuellífue mo uai nabáitate. <sup>6</sup>Mei íadi Cristo, jofona náamataga Jitó izói, nana ie anamo itínona ñue jaícina ocuíoide. (Afe daíí Cristo Moisés báífene ímienaza onódicai, mei naga jító, jofo ero táijiraíma baimo itímienaza.) Iemona Cristo dáinana, cai ínuafue ñue riire itífuedo are illa ícoímo jeire cai oíadi, Juzíñamui comínidicai. Afe llezica afémiemo caímare cai úíñuana jítáirede.

### Juzíñamui comíni comecí caímare uái illafue

- <sup>7</sup>Ie jira Juzíñamui Ñuera Joreño jaiái Cuegáuaido daide:  
 Birui Juzíñamui daináuai omoi cacana llezica omoi coméciai ríiretañeno iri.
- <sup>8</sup>Jaiái énie zaféredínodo Israel comíni facátaruimo afémaci íaioi comecí riire fínuano Juzíñamuina uáitataíoi.  
 Jíi, afe izói omoi íñeno iri, daide.

<sup>9</sup>Iemo nane Juzíñamui daide:

Aféruillaído jaiái omoí uzútiai Judíuai cuemo finoñeno fieni  
facátafuedo cuena facátataiaoí.

Cuarenta diga fimónado nana íaioímo cue finócafuiaina ciódiaioí  
íadi, cuemo fieni coméciidiaioí.

<sup>10</sup>Ie jira afe bigíma cuena rícaítade.

Afémacido daidicue: “Íaioí comeci cuemo figo jaináñenamona, cue  
lloga io onóñeno oni nibéfodo jáidinona itíaioí.”

<sup>11</sup>Iemona áferi icírillano ríírede uaido daidicue: “Jaca cue lloga  
caimare comécina uái ocózinailana óñeítiaioí,” daidicue.

<sup>12</sup>Amatiai, daje izóí figóñede, núefuena íáiruiga finoñede comécimona  
mai abí omoí rairuiri, afe izóí omoí ñeíllena. Mei afe izóidímie cai  
caade Juzíñamuimona oni eneno jica íteza. <sup>13</sup>Mei íadi nágaruillaído,  
Juzíñamui ómoína nai uáidua llezica, Juzíñamui dibénemo ñue riire  
jainairi. Iemo daní ómoimona ñue lletari. Daíí ñue omoí llóiri, fiénidífue  
ie abi jífuiáfuedo buna ómoimona dáamie comécina rííreíñellena. <sup>14</sup>Mei  
nanóidemona caimo ite izire ñinogafue, riire fáicanocaiñeno uáfueña cai  
onóíadi, jae Cristo dibénemo jaináidinodicaí. Aféfuemo rairuíñeno ñue  
omoí jíeruiri.

<sup>15</sup>Juzíñamui Cuegáuái daíí daide:

Birui Juzíñamui daináuaina omoí cacana llezica, jaiái Israel

Juzíñamuína uáítajaruímo comeci ríírena izóí, omoí comeci  
rííretaneño iri.

<sup>16</sup>¿Bu mei afe Juzíñamui uai cacádino íadi, nane dánomo íena uáítate?  
Mei nana Egíptomona Moisés bairócamaci Juzíñamuína uáítate.

<sup>17</sup>¿Mei nímaci cuarenta diga fimona Juzíñamuína icírítate? Mei nana  
afe Juzíñamui uai finoñeno fieni finódino; nii afémaci ícuruai énie  
zaféredinomo fiénocaiga. <sup>18</sup>¿Nii náiraina ríírede uaido Juzíñamui daide:  
“Jaca cue lloga caimare comécina uái ocózinailinomo dúciñeítioí?”

Mei nana afe ie uaina cacádinona íadi aféuaina jeire oñédinona  
daíí daide. <sup>19</sup>Daíí íaioína dáinana íaioí finoñenado jofo cáímanomo  
dúcinidiaioí. Ua daíí ñúenomo íaioí dúciñenana onódicaí.

**4** <sup>1</sup>Ja birui Juzíñamui uafue caimo lloga caimare comécina uái  
ocózinailana cai olle uai caimo ite. Aféuai nai caimo illa llezica mai  
ómoimona dáamie aféuai comécimo óñeíllena daíítadífueñona mai abí  
omoí rairuiri. <sup>2</sup>Mei uafue cai bie núefuena llogámacidicaí. Ua afe jaiái  
Egíptomona bairócano núefuena llóina izóí núefuena llogámacidicaí.  
Mei íadi íaioí cacana uai figo íaioína canóñede; mei ñinoñediaioíza fia  
táinona cacádiaioíza. <sup>3,4</sup>Mei íadi Juzíñamui lloga caimare comécina uái  
ocózinailinomo nahí jofo jáidinodicaí, mei ie uaina ñue cai ñinofírenado.  
Birui Jesumo cai ñinuamona, caimare comeci jacíruíñenafue dibénemo  
jóonegacaí. Jira ocózinairanomo táijñeno cai illa izóí, jae caimare uái

iticaí. Ie mei uire Juzíñamui illánomo ñue afémie diga caimare uái iticaí. Jaiái ñinoñedinona Juzíñamui daide:

Iaioimo cue rícaillano ñue riírede uaido daidicue, “Afe cue lloga caimare comécina uái ocózinainllinomo jaca dúciñeitiaioi,” daidicue. Daií Juzíñamui íaioina daide. Mei íadi ua íaioi caimare illífue Juzíñamui are úcomo mamécaza; mei jae are énie ie comútaruimona, nana Juzíñamui ie finócafuiái, naa caimare cai illífuiáiri, jae fuitádeza. Mei Juzíñamui jíáinomo ie Cuegáuaimo afe ie ocózinainllaruido úrite; daide:

Juzíñamui seis dígarui táijide; ie táijina mei siete iruimo nana ie finócafuiáimona caimare uái ocózinaide.

<sup>5</sup>Afe mei jíáiruido ie Cuegáuaimo Juzíñamui daide:

Cue lloga caimare comécina uái ocózinainllinomo dúciñeitiaioi.

<sup>6</sup>Iemo ñúefuena nanoide cacádino ñinoñenamona afénomo jofo íaioi jáinina méifomo, áfeo nai jíáimaci jáillena túide. <sup>7</sup>Ie jira Juzíñamui diga fimona jailla mei, David roráncuaido comini uáiduano meine jíáie billirui íaioimo llote. Afécuaimo, due jiza illamona cue lloga izói, Juzíñamui daide:

Birui Juzíñamui daináuaina cacádiomoiza omoi comécina riíretañoeno iri, daide.

<sup>8</sup>Mei íadi Josué afe jaiáidinona nahí caimare come comeci jacríuñenanomo uíñede. Ie jira diga fimona illa mei Juzíñamui meine abido comini caimare illíruina úrite. <sup>9</sup>Iemona afe nahí caimare come comécina uái ocózinainllafue nai ite, Juzíñamuimo jaináidimacina dani íaioiena maiñóllena. Afe ñue caimare cai illífue ocózinainllaruimo cai ocózinaila izoide. <sup>10</sup>Mei naga afe Juzíñamuimona oga caimare illífuena maiñódimie, dama ie jíllolle naa ie nícidogano fáicanocaillano, caimare uái ite. Ua Juzíñamui naga ráaniai ie fñua fuilla mei, ocózinainllano caimare uái ite. Afémie uái illa izói caimare uái iticaí. <sup>11</sup>Ie jira afe caimare cai illífuena mai ñue omoi maiñori. Mai benómona daií omoi ífíreiri, ómoimona buna jáiairagima bífuena íaioi ñinoñenado íaifuemo baílla izói omoi báíñeillena.

<sup>12</sup>Nana Juzíñamui lloga uai, jaca íocire cáadimie izoide. Afe uai jaca ninomo riíredeza, buna oni caitánide uai. Aféuai comini ífóciaimo déífirede; ua íaioi comécina zuitáfirede. Mei jíi, jáire jicaica lloéfaido abi ñeta iere jofo ícurumo raire dúcizailla izói, afe izói Juzíñamui uai nana cai comeci ífuiai onótate. Uáfuena cai comeci facáduana naa cai comeci jítaillafuiáiri fídiano ñue uáfodo jácina jino caimo onótate.

<sup>13</sup>Nana Juzíñamui finócafuiái íemona oni retáidonide. Ua, daa Juzíñamui cíóñenamiena íñede. Nana cai comécillafuiái cai finócafuiái diga, uáfori cai nahí Jicánoraima ui anamo ite.

### **Jesús Juzíñamui dibénemo caido ñue úrifiredillaíma**

<sup>14</sup>Jae Juzíñamui Jitó, Jesús, mona úillie illano iere caifófenemo jaillano, Juzíñamui illánomo dúcide. Dúciillano Juzíñamuimo dibénemo

caido ñue raire úriraimana jaide; ua afémie caido úrifiredillaimana jóonega. Afe bie úriraima caimo íllaza, mai nana afémiemo cai comécilli; afémiedo cai ínogafuiai fáicanocaiñeno jaícina riire ñue íemo cai ínoilli. <sup>15</sup>Afe caido Juzíñamuimo úrifiredillaima nana cai abi ríidolle ríino íñénana onode. Ua afe cai ríino íñenamona cai féiraifirenana afémie onode. Ie onónamona caimo dúceafirede; mei afémie cai izoide cómena íficaillamona, nana fieni facátafuiai cai cacana izói cacade íadi afe fiénidifuiamo baíñede. Iemona Juzíñamui dinena jáiredícai. <sup>16</sup>Ie jira Juzíñamui illáimana illánomo cai úrizaiilli; mai omoi jacíruiñeno afe caido úrifiredillaimado Juzíñamuimo raire úrifireiri. Daí íemo úriredícai caina ie dúcaillano cai fieni finócafuiiai iba caimo óñeilla; daje izói afémie cai jitáilliruido cai canóllena, afémiemo úriredícai.

**5** <sup>1</sup>Naga come dibéfodo Juzíñamuimo úritillaima comínimona nizeda oga. Uano Juzíñamuimo comínido úrilla mamécamie. Daje izói afémie comíni dibéfodo Juzíñamui íóbitalle ráfuiiai finófireilla mamécamie. Iaiói Juzíñamuimo fia iga ráaniai afémie izájite. Daje izói íaiói fiénidífue iba otátanille fia fállena fecaca tóica rílleniai afémie Juzíñamuimo izájite. <sup>2</sup>Afémie ríinide cómena íllamona, íaiói illa izói abina onóñedimacina fíaicana comeci járitañenado caimare fíraizitaite. Daje izói oni nibéfomo baíídinona comeci járitañeno llétaite. <sup>3</sup>Mei afe nizécamie cai izói ríinidímie. Iemona dama ie íaífuiai muiñolle tóica rille jíáimaci fécajilla izói, afémie jíái fécajirede. Ua nana comíni dibéfodo izáibilla izói, dama íeiena afémie izáibirede.

<sup>4</sup>Afe iere ñuera Juzíñamuimo úriraimana íllena, buna dama ie comeci jítaina izói ínide; dama Juzíñamui jóonegamie daí írena. Afémie caimare jacíruigamie. Jaiáidíruimo daí Juzíñamui Aarona uáidote. Uáiduano, Juzíñamui íena nizeda úritillaimana jóonete. <sup>5</sup>Afe izói Jesucristo Juzíñamuimo comínido úriraimana íllena raire dama uícoficaiñede. Mei íadi Juzíñamui daí úritillaimana ie jóoniacana llezica íena daide:

Cue jítódío; ja birui illáimana o jóoneitícue, daide.

<sup>6</sup>Ie mei daí dainámiena Juzíñamui jíáinomo nane daide:

Jaca nínomo Juzíñamuimo comíni dibéfodo úriraimadio. Ua jaiái nínomo Juzíñamuimo úriraima Melquisedec izói jaca nínomo Juzíñamuimo comíni dibéfodo zíñona úriraimana íitio.

Aquíe izói Juzíñamui ie Jitó Jesuna daide. <sup>7</sup>Cristo cai come izói bie éniiedo jáicaillaruillaído, izire écana Juzíñamuimo comeci facade. Iemo dáaruido Juzíñamuimo izire jícade. Afémie daí íena jíllotaredimíemo comécido úrite; daide: “Bie cue tíiacanafuemoná maí cue jíllota” daide. Iemo Moo Juzíñamui anamo afémie ñue itábicaillamona comécido Juzíñamuimo ie jícajana Juzíñamui cacade. <sup>8</sup>Daí Jesucristo Juzíñamui Jitó íadi, ie duere zefuíllafuíaído ocuilla uai anamo itábicaillana fíbide.

<sup>9</sup>Afemona afémie daí nana cai jíllóillífue ñue fuitállena jamánomo

jaícina fibítagamiena jaide. Ie jira nana íemo ínotimaci dibénemo Jesús zíñona Jíllotaramana jaide. Ua zíñona jíllonafue tainédimiena jaide. <sup>10</sup>Mei jira Melquisedec izóidimie Juzíñamuimo comini dibéfodo ziiño úrifireitimiena, Jesús jae Juzíñamui mamécamie.

### Cai ínogafue meine abido cai jáanolle iere jacírede

<sup>11</sup>Bífuiaido aillo úriacadicue, mei íadi iere cacáacañediomoi. Iemona nai figo baitáñedino izói itfomoi. Daií omoi íllamona, bífuiai ómoimo jino cue lolle iere féirede. <sup>12</sup>Nauí nano Crístomo omoi ínuaruimona jae diga fimona jaide. Iemona jae oni jíáimacimo omoi llófuerizaille iere jitáirede. Mei jíáifodo ja birui meine abido Juzíñamui llogáuai tainéinafuiaina ómoimo jíáima llófuelle jitáirede. Nai monoi jirode úrue izói meine abido úruetaidomoi; nai figo baitáñedino izói itfomoi. Ua llíciaina nai rínide izóidinona abido jáidiomoi. <sup>13</sup>Mei jíi, naga monoi jirófiredino, móonaiñena llezica nai dúetiru. Daje izói naga Juzíñamui anamo ñue jaícina caina móonaitade llófueinafue dibénemo baitáñedimie nai úrue izoide. Mei afémaci nai móonaiñeno úruiai izói baitáñediaioiza. <sup>14</sup>Mei jíáifodo dama móonaite écomini llíciaina rírena. Afe izói Juárezde llófueinafue ñue onona dama comécina ñue jéedimacimo dúide; mei afémaci aillo facáfírenamona ñúefue fiénidífue baímo ñue onónana fibídiaioiza.

**6** <sup>1</sup>Ie jira afe nánoide Cristo dibéfodo llogáfuiái ómoimo llúana ja mozíñocaidicue, jíáie cómfue ómoimo jino cue llóllena. Omoimo cue lolle bie cómfue, Juzíñamui llogáuailaído ómoína ñue jaícina móonaitaite. Aféfuiai mai jeire cai olli. Nano úfcodo lloga ñúefue jillácina meine abido diga icaiño ómoína llófueñeiticue. Afe nanóidífuiái bie izói daide: “Ómoína jíllotañeite omoi nícidogafuiái fáicanocaillano ñúefuena méidori. Méiduano, mai Juzíñamuimo omoi ínori,” daide. <sup>2</sup>Iemo afe nanóidífuiái báutizaafuedo úrite. Iemo dáanomo onoi cómemo bítafuedo úrite. Daje izói come tñille mei, afe tídinomona meine abido cáallífue llote. Afe emódomo, íirairuimo Juzíñamui nana comínimo jíacánolle mei zíñona duere finótallífuedo úrite. <sup>3</sup>Nana bie nanoide llogáfuiaina meine abido llófueñeiticue. Mei íadi, Juzíñamui comeci jitaina izói, afémie cue canólledo, ñue móonaitadífuiaina omoi llófueiticue.

<sup>4-6</sup>Daií birui ómoimo llófueacadicueza, mei nanóidífuiaina uáitajano oni jíáifodo féiraitimíiai íaioi illafue nano ñue ínogafuena jaca méidonide; mei afe ñúefuena nai náfueñediaioiza. ¡Mai, abí omoi rairuirí! Afe daiítadimaci nauí dáaruina Juzíñamui llófuegamaci izóidiaioi; ua Juzíñamui dibénedo ífócina déitaganona itíiaioi. Daje izói, monamo ite Juzíñamui daina caimátallífueña facádiaioi. Iemo daje izói afémaci Juzíñamui Ñuera Joreño úcaillana jae facádiaioi. Afe llezica Juzíñamui ebírede daináuai cómena ñúetatífueña afe



íaiói fácamona, ñúerana onódiaíoi. Afe emódomo, Juzíñamui Jitó uire illáimana illirui llezica, íemo ite comini cáimadolle ríinodo jae bimaci canócaiaíoi. Jae nana bie núefuiaina fibídiaíoi. Mei íadi afe mei Juzíñamui ífuiaina móonaitaíñeno, aféfuiaiana íaiói uáitaiadi ñúefuena méidofinidinona jáidiaíoi; mei daíí afémaci íllamona Juzíñamui Jitona cruzmo fatátatimaci illa izói afémaci dani itíaióiza. Ua nairai uíecori íena jífánodoia izói íena meáidaitadiaíoi. 7Bie izoide comini comue jacafai aínena izoide. Juzíñamui bíitaga noci naga éniemo díga ícaíño bíide. Iemona afe éniemona ñue ria aite, afe éniemo tájjidino güíllena. Aféniena Juzíñamui ézicite. 8Iadi jíáinomo noci bíilla mei, daa figóñede éegiai ailla, naa zaie díga. Afe izóidinie ráifíñedeza; níbai íanori íllamona Juzíñamui fáidoite. Iirainomo afénie jobáillamo dúide, naa afénomo zicódinuairi mei figóñedeza.

### **Cai úiñoigafue caina riire nabaide cai íinogafue féíñellena**

9Mei íadi cue izíruiga ámatiaídiomoi. Jae cue lloga faidórafue baímo jamánomo ñúefuiai díbénemo jáináidiomoi. Ua omoi jíllonafuemona comuide cáimaduafuiai mainófirediomoiza. Aféfuena ñue onódicue. 10Juzíñamui comécina jáicina jóidimie. Iemona nana íena omoi izíruillamona omoi finoca Juzíñamui comini cánua ráaniaína, afémie féitañede. Daje izói aféfuiaímo nai birui jíeruitíomoi. Ua Juzíñamui jáináidinona izíruillano, ñue afémacina riire canófirediomoi. 11Ie mei birui afe izire omoi nícidua izói, daje izói ómoimona illa dígamieriena Juzíñamuimo ocúrirí daidícue. Iemona omoi íinogafuiai jeire ómoína otátaacadícue, omoi úiñoigafue táinomo fáifíñeillena, mei jíáífodo ñue jáicina omoi fuitállena. Afemo ómoína nágarui izire coméciiri daidícue. 12Daíí izire omoi coméciioillamona ráiraiedino illa izói íñeítiomoiza. Mei omoi ñue coméciillamona, jíáífodo daade Juzíñamui lloga ua caímare illafue díbénemo itino illa izói ítíiomoiza. Afémaci íaiói íinogafuedo íaiói abina ñue ínóinafuena Juzíñamuimona otíaiói. Ua comeci járitaiñeno are illa ícoímo Juzíñamui uícodo íaióimo lloga ñúefuena mainórioidiaíoi. Íaiói illáfuemo ñue omoi coméciiri, íaiói illa izói omoi íllena. 13Mei jíí, Juzíñamui iere íinofíregamie. Jáiai Abraham illáruimo Juzíñamui uafue uai Abrahamo llote. “Aillo comini jebuítaitío” jáiai uícodo íemo llote. Llua llezica uafue daííllena Juzíñamui dama ie mámecina llíínote, aféfuena Abraham ñue ínollena. Ua Juzíñamui dama ie mámecina llíínote, mei jíáie baímo jamánomoidimíena íñédeza. 14Daíí Juzíñamui Abrahana daide: “Uafue iere ona ñue caímátaitaitícue,” daide. 15Iemona Abraham comeci raíre járitaiñeno, díga fimona afemo úiñoode. Daíí ie ocúrina mei, afe Juzíñamui lloga caímare ie nairai jebuíllífuena Abraham ñue mainódeza. 16Bíníe comini cígímona dáamie

uáfueña daiíacana llezica, afémie baímo riíredimie mámeçido uafue daiítate. Daií lloga uaina buna oni caitáíñede. Nana dani íaiói júfídogana záítate. <sup>17</sup>Daje izói Juzíñamui ie lloga finóllifue, jíáie ñue riírede uaido, aféfuena iere uafue daide. Afémie daií dáideza, mei ie uícodo lloga ñúefuena máíñoitinomo, afefue ua jíáífodo méidonidena jino íaióimo uáfodo llóiacadeza. <sup>18</sup>Daií Juzíñamui mena caitánide uáillaído íaióimo llote. Afe ménacaiño ie daina dibénemo Juzíñamui táinona llónide. Afémie daií daide, áfemona cai comécina ñue íociretallena. Iemona caímo ie lloga ñue cai jíllonafuemo fáicanocaiñeno ínofiredicai. Mei jíí, cai Jíllotaraima Jesucrístomo jarire jaillano caina ie úíñotaga começi íaífue dóllena raire íemo jícádicai, caímo ite fíenidífue iba óñeillena. <sup>19</sup>Afémie cai jíllotallena caímare úíñoidicai. Iemona afémie caina daináuai cai começi nífuenina ñue mozóitade. Ua cai úíñoigafue caina riire nabaide cai íinogafuiai féíñellena. Daií começi docáíñeno ñue riire nabáitaga jacríuñedinodicai. Mei cai jíllotaite cai úíñogamie Jesús, caífo monamo Juzíñamui nahí ie iránomo íteza. <sup>20</sup>Afe Jesús, cai jáillio ífódimiena afénomo jae jaide. Daií íllamona afémie jae comínido Juzíñamuimo zííñona úritillaímana jaide. Ua, jaiai Juzíñamuimo úriraíma Melquisedec izóinado, Jesús jaca ninomo caído úrite.

### Jesús, jaiai Melquisedec illa izói comínido Juzíñamuimo úriraíma

**7** <sup>1</sup>Afe Melquisedec Salem jofue illaíma. Afe llezica afémie comíni dibéfodo jamánomoide daade Juzíñamuimo úrifiredimie. Jaiai illáruimo Abraham jíáie aféñemo ite illáinina anáfenuaide. Iaióina anáfenuano Abraham meine bítemo, afe Melquisedec io anamo Abrahamo dúcizaide. Dúciillano Melquisedec, Abraham abí ñue finóllena Juzíñamuimo jícade. <sup>2</sup>Afe llezica Abraham nana ie bairoca ñuera ráaniaímona, Juzíñamui fena eneno mameca ráaniaína, Melquisedécimo raiñóñeno fia fecade. Melquisedec nanoide daina mámeçi “Comécina jáicinaidíllaíma” fueñe daiíacade. Ie mei afémie nane jíáici ote: “Salem Illaíma.” Afeci “Comíni comécina caímare uái itátatíllaíma,” daiíacade. <sup>3</sup>Afe Melquisedec moo mámeçi jaca onónide, naa ie ei mámeçi diga. Daje izói ie emódoídígima jíái óñoñega. Daje izói afémie jocóinarui óñoñega, ie túllarui diga. Iemona afémiena comíni “Zííñona ítímie” daide. Afe Melquisedec comíni cígiri illáfuedo Juzíñamui Jitó zííñona cai dibéfodo úriraímana illáfuena caina fidítate.

<sup>4,5</sup>Mai bífuemo ñue omoi coméciri, Melquisedécimo ite jamánomoidífueña omoi onóillena. Ua Melquisedec, cai nanoide jáiiragíma Abraham baímo jamánomoidimie. Mei Abraham ie bairoca ráamona Melquisedécimo fecádeza.

Abraham enaize Jacob doce dígade jítórede. Iemo afe jítóníai cígímona Leví comúideza. Afémie comíni dibéfodo Juzíñamuimo úrillena

Juzíñamui nizada ogámie. Ie jira nana judíuai Juzíñamuimo úriraini Leví úicoidigimamona comuitagaiaioi. Afe Juzíñamui nizeca Leví náiraina, Juzíñamui Moisés ocuica uaido daide: “Nana jiáie judíuai nairai imácimona Juzíñamuimo dúide ráaniaina órediomoi,” daide. Ua Leví náiraimo ibárede, nana jiáie Israel nairai daa Abrahámona comúidino íadi. Ie jira Leví comini nana afe Juzíñamuimo dúide ráaniaina llínofirediaioi. <sup>6</sup>Mei íadi afe Melquisedec, Leví nairai izíe íeñede. Mei íadi afémie áfena llínoñeniadi afe Melquisedec, Leví emódoidigima Abrahámona Juzíñamuimo dúide ráaniaina uáfena llínote. Iemona Melquisedec Leví baimo jamánomoidimieza onódicai.

Afe ráaniái ie llínuua llezica, Melquisedec Abrahamo úrite. Abraham Juzíñamui íemo ñue finóllifue, uiécolo fidítagamie. Iemo ja birui Melquisedec afémie ñue éziciano daide: “Juzíñamui ona ñue cánoiteza,” daide. <sup>7</sup>¿Níbémie mei jamánomoidimiena? ¿Ezicitimie mei nibai ézicigámie? Ua, ézicitimie baimo jamánomoina. Afefue buna jáanoñega. <sup>8</sup>Nane jiáífue llóiticue. Cai cígimona eneno nizeca Leví comini, Juzíñamui íena nano mameca ráaniaina llínofiredino. Mei íadi afémaci fia comínza tíffirediaioi. Mei jiáífodo afe jiáie llínotimie Melquisedécina mámeçiredimie Juzíñamui Cuegáuai daina izói, tíñeno caade izóidimie. Ie jira Melquisedec jamánomo báimoidimie. Leví imaci nai Melquisedec jofófeneidino. <sup>9</sup>Iemo jiáífue Leví daírede. Leví Abraham erófene ígima. Mei íadi afe Juzíñamui íena eneno mameca raana llínofiredimie jaiai uécodo Melquisedécimo ie uzuma Abrahamdo Juzíñamuimo dúide raana ibade. Daí Leví comini, jaiai uiécolo Juzíñamuimo dúide raana Melquisedécimo íbádiaioi. <sup>10</sup>Mei Leví nai jocóñena llezica ie comúllino nai Abrahamo íteza. Ua Melquisedec ja Abrahamo dúcinaruimo, Leví jocóllino nai jaca ie nanoide uzúmamo ite. <sup>11</sup>Israel náiraimona eneno nizécazie Leví comini. Aféziemona nizeca nanoide Juzíñamuimo úriraima Aarón. Afémie naa ie erófene ígímaíri comínido Juzíñamuimo úriraini. Ie jira afe úrirainido Israel nairai Juzíñamui ocuilla uáillaina llogáiaioi. Mei íadi nana afe Juzíñamuimo úriraini finócafuiai comini ua ziiñona jlloillena figo jinoíñede. Comini comécina Juzíñamui jítaina izói nahí jaícina jóoitañede. Aarón naa ie erófene ígímaíri finócafuiai figo jinoñena jira, jiáie afémie izóíñede baimo jamánomoidimiena jítáidicai, afémaci méífomo jóonellena. Ua Melquisedec ziiñona illa izóidimiena jítáidicai. (Ie jira afe Aarón comini meífo méidoitimiena Juzíñamui jae jino náiraimo cíotote. Afémie mámeçi Jesucristo. Ua Aarón comini méífomo jóonegamie Melquisedec izóidimie Jesús; afémie Aarón dibéfomo jaináíñede.) <sup>12</sup>Jae afe jaiai uícomo ite Juzíñamuimo úriraini nana dáanomo jiáiena íaioi méidua llezica, afe Moisés íaioimo ocuica uailai daje izói jiáífodo méidorede. <sup>13</sup>Juzíñamui Cuegáuai daí dainámie cai Ocuíraima Jesucristo. Afe como jóonega Juzíñamuimo caido úriraima

Jesús, Leví nairai ímieñede. Jiáziemona comúdimie. Ie nairai ímiaina jaca nizéñega, Juzíñamuimo comínido úrillena. Ua comini fia fecaca tóica rílleniai naa ráaniai diga Juzíñamuimo izájillena, nízeñegaiaioi.

<sup>14</sup>Ñue onóigaza cai Ocuíraima Jesús Judá náiraímona comúdimie. Moisés afe náiraímo Juzíñamuimo úrirainina íllena, jaca lloñede.

<sup>15</sup>Afe jiáie como jóonega comínido Juzíñamuimo úriraima Jesús, jino cióillamona, bífuaina jino uáfodo baimo onódicai; mei dama afémie Melquisedec izóinaza. <sup>16</sup>Bímie dama ie ñue ziiñona ífirenamona comínido Juzíñamuimo úriraimana jaide. Mei jiáifodo Leví náiraímona jaiai nizeca Juzíñamuimo úriraini ocuica uai dáinado úrirainina jáidiaioi. Afe uai ñie náiraímona nizéllena llote. <sup>17</sup>Mei íadi como jóonegamie Jesuna Juzíñamui ñue riírede nabáitaja uaido daide:

“Melquisedec izói jaca ninomo Juzíñamuimo comínido ziiñona úriraimana ja birui itfoza,” daide.

<sup>18</sup>Iemona afe uícodo ite ocuica uai jae oni caitaca, mei afe uai riínideza. Iemo jiái, aféuai comini comeci nahí duáfueña figo jínotanideza. <sup>19</sup>Afe Moisés ocuica uai buna comécina nahí jaícina finóñede. Mei jiáifodo jiáie aféuai baimo, ñuera cai jíllotaite úiñoigamie Jesucristo jae caimo cótoga. Afémiedo Juzíñamuimo ánozifiredicai, uáfodo Juzíñamuimo cai úrillena.

<sup>20</sup>Afe Jesucristo Juzíñamui riire nabáirede uaido jóonega. <sup>21</sup>Ie uícodo Juzíñamuimo úrirainina jáidino, riírede uaido jóoneñegaiaioi. Mei íadi Jesús comínido Juzíñamuimo úriraimana jáillaraimo, Juzíñamui riire nabaica uaido ja daí mameca. Mei Juzíñamui ie Cuegáuaimo Jesudo úrite, daide:

“Cue Juzíñamuidicue. Bifue riire cue nabaica uaido daidicue. Cue comeci faca uai jaca jiáiuaina méidoñeiticue.

O ziiñona comínido Juzíñamuimo úriraimana itio;  
Ua Melquisedec izóidimiedio,” daide.

<sup>22</sup>Ie jira Jesucristo, Juzíñamui jamánomo ñuera caimo comue finóllifue caina ñue onótate. Ua Jesucristo aféfuemo iere uafue daide. Afe finóllifue Moisés lloga nanoide finóllifue baimo ñuera. <sup>23</sup>Jesucristo uícoidiruillaímo ite Leví náiraímona nizeca Juzíñamuimo úriraini ua aillo ite; mei íaioi tícozifirenamona jaca jiáimiena méidofiregaiaioi.

<sup>24</sup>Mei íadi Jesús cai dibéfodo Juzíñamuimo úrillana, jaca jiáimiena méidonide; mei afémie jaca ninomo ziiñona itímieza. <sup>25</sup>Iemona Jesús nana íedo Juzíñamuimo úrizabitinona, jaca ninomo jaícina ñue jíllotarede, mei afe Jesús, íaioiri Juzíñamuimo ziiñona úriraimana íllaza.

<sup>26</sup>Ua, afémie izoide Juzíñamuimo comínido úritillaímana jaiai ninómona jitáidicai. Ñue cai jíllollifue afémie caimo ñue zúitaitimie, mei afémie nahí ñuera nífuenidimieza. Afe llezica afémie nana fiénidimaci íaífuemona oni eneno rairuícamie. Ie mei afémie mona

ero úcuai illa caifomo, Juzíñamui nahí illánomo uigámie. <sup>27</sup>Jai ai uícomo ite Juzíñamuimo úritillaini nágaruillaído tóica rílleniaina fatá Juzíñamuimo izájifirediaioi. Nano fueñe daní íaioimo ite íaifue ícoinia áfeniaina izájidiaioi. Afe mei comínimo ite íaifue ícoinia áfeniaina izájifirediaioi. Mei íadi Jesús afe izói fínuana jítaiñede. Afémie dácaíño nana comini íaifue ícoinia dama ie abi Juzíñamuimo fecade. Ua cruzmo ie duere zefuida tíllado abi fecade. <sup>28</sup>Afe Cristo uiećodo lloga ocuíllafuedo llotino, jíáie jamai figo nahí jaícina finótañede comínimona Juzíñamuimo úritillainina mamé diaioi. Mei jíáifodo, afémaci méífomo jóonega úritillaima Jesucristo, Juzíñamui ñue riire nabaica uaido jóonega. Afémie jaca ninomo nahí jaícinaítaga Juzíñamui Jító.

### Juzíñamui caimo cómuena finóllifue, Jesús caimo jino denódimie

**8** <sup>1</sup>Nana cai daináfuiamona llógana bie ñue nahífuena ómoimo llóiticue: Como lloga caimo ñue jóobide caído Juzíñamuimo úriraima birui ja caimo ite. Afémie caifo monamo ite Juzíñamui nabézimo ráinazaide. <sup>2</sup>Dinomo Juzíñamui nahí illánomo Jesús íllamona, jamánomo ñuera Juzíñamui uiećodo Jesús caído úricabite, cai jíllloillifue ñue caimo zúillena. Afe Juzíñamuimo cai nahí áinozirano comini fñoñega. Jai ai bíniemo ite Juzíñamuimo áinoziraco comini niga. <sup>3</sup>Naga Juzíñamuimo úritillaima, fia iga ráaniai, tóica rílleniai diga Juzíñamuimo fecáfireitimiena mameca. Ie jira cai dibéfodo Juzíñamuimo úriraima Jesús, daje izói dama ie fécajille raa jítáirede. <sup>4</sup>Bíniemo afémie nibai abido ie bia, afémie caído Juzíñamuimo due jiza úriraimañeite, mei Moisés ocuícáu ai daína izói Juzíñamuimo caído úriraini bíniemo nai íteza. Daje izói bimaci nai benó Juzíñamuimo fia fecaca raana íemo izájifirediaioiza. (Ie jira caído ziiño úriraima Jesús, caifo monamo Juzíñamuimo cai ie canólledo úricabite.) <sup>5</sup>Bíniemo ite Juzíñamuimo úriraini aillo ráfuiaido nícidotiaioi. Nana íaioi nícidogafui ai jánana mameide. Íaioi finócafuiai caifo monamo ite Juzíñamui nahífuai ina caina fidítate. Daje izói bíniemo ite jai ai Juzíñamuimo áinoziraco, Juzíñamui nahífuena cai fidítaraco. Afena onódicaiza, mei Moisés afeco nitátaacanaruimo, Juzíñamui íena daide:

“Caifónedumo o illa llezica omo cue ácataga afécona o ciona izói, afe izói jaícina mai o niiri,” daide.

<sup>6</sup>Mei íadi bíniemo ite Juzíñamuimo úriraini nícidogafue iere afe baímo, cai caifo monamo ite úritillaima Jesús caído jamánomo ñuefuena nícidote. Mei jíi, afe Jesucristo caimo zuitaca Juzíñamui ñuera cairi comue finóllifue, jai ai Moisés lloga finóllifue baímo ñuera. Mei Moisés ocuica uai baímo, Juzíñamui uícodo lloga cómfue jamánomo ñuera uáimona comuídeza. <sup>7</sup>Afe Moisés lloga nanoide finóllifue, comini jíllloillena ñue jínoiadi, jíáie uire iite ñue finolle uai jítaiñeítiaioi. Mei

íadi afe naonide uai íaioi jíllloillena figo jínoñede. <sup>8</sup>Afe nano ocuica uai jeire otino nahí jaícinaidífuego figo dúciñediaioi. Dúciñediaioimona, Juzíñamui ie Cuegáuaimo íaioina daide:

“Uire jíáiruido nana Israel náiraímo comue ñue cue finóllifue ócuiticue, naa Judá náirairi.

<sup>9</sup>Jaiái íaioi uzútiaímo cue daina ocuica uai izói, ócuíñeiticue. Jaiái aféruillaído Egipto éniemona afémaci billa llezica íaioina ífódicue:

Ua afémacina izire úicaidicue.

Mei íadi cue lloga ocuica uaina nano íanori fáicanocaillano, áfena figo náfueñediaioi.

Afe jira íaioina zóofeticue,” Juzíñamui daide.

<sup>10</sup>Nai nane íaioina lluno Juzíñamui daide:

“Uíreitruillaído Israel imácimo bie izói cue ñue comue finóllifue ócuiticue.

Aféruillaído cue ocuica uáillaina íaioi ífócimo jaícina déitaiticue.

Ua aféuaina íaioi comécido jeire íaioina otátaiticue.

Iemona afémacina dama cúeiena nane meine abido máíñoiticue.

Afe llezica íaioi nahí Juzíñamuina ííticue.

Iemo cue náiraina íítiaioi.

<sup>11</sup>Aféruillaído nana afémaci uáfodo ñue cuena ónodiaioiza, cuena íaioi onóillena abi diné jíáima llónide.

Iemona ie abi ímíaiímo buna Juzíñamuina onótanide. Daje izói dámie ie ámamo Juzíñamuina onóillena llóñeite; mei nana cuena ónodiaioiza.

Naga jamáimie, íemo jíái naga jamánomoide ríredillaíma, nana daje izói cuena ónoítiaioi.

<sup>12</sup>Nana íaioímo cue dúecaillamona íaioi fieni finócafuiái ibana óñeiticue.

Nana íaioi comeci íaifuiaina jaca ninomo féitaiticue.

Aféfuiaina úibiñoñeiticue,” dinó Juzíñamui daide.

<sup>13</sup>Bie méifodo lloga Juzíñamui finóllifue, cómofuena méiduamona, afe uícodo Moisés lloga finóllifue jae jaiáiza feide. Afena Juzíñamui daíí uáfodo llote. Iemo naga jaiái raa zabízaillamona raire oni dotánocaiga; oni dotánocailleza cíñoñelle.

**Bíniemo ite Juzíñamuímo ánozirano, jana izói jíáie  
monamo ite Juzíñamuímo ánozirano cai fidátate**

**9** <sup>1</sup>Afe nauí nano lloga finóllifue llua llezica, Juzíñamui íemo ánoziraco nitátate. Afe nitátaja dáaruido, comíni Juzíñamuina íóbitalle uallai afémacimo daje izói lloga. <sup>2</sup>Afe lloga Juzíñamuímo ánoziraco Moisés nitátaga. Afeco ere niñeno jédaciede ínroina íbáicaco.

Afe áreco ero ménaco titaca. Jinóidico Juzíñamui Ñúeco daina. Afeco eromo áillue mechera izoide egáñora ite. Siete diga dájemona boode raa ite. Dáanomo Juzíñamui dibénemo oni enénorie rairuica pan jóonerabani ite, naa afe páaniairi. <sup>3</sup>Afe ánoziraco jofóidico Jamánomo Ñuera Rairuícaco daina. Afe jofóidico daje izói jédaciede iníroina ruica diné eróicana nacona ibaica. Jédaciede jígarei izóidena fetaca. <sup>4</sup>Afe fetaca jédaciroi abimo uguci jobáirabani ite. Bibani lílaide órona jinófene aifitaga. Bie jofóidico eromo daa áillue ráaniai éenora ite. Cajona eroide. Afe éenoraco nana jinófene órona aifitaga. Afe éenoraco eromo Juzíñamui nofici ibícimo cuega ocuica uaillai ite. Ie jira afeco noffbícimo cuega Juzíñamui cai ocuilla éenuacona mameina. Iemo afénomo daa oro finoína nogo ite. Afégomo ite Juzíñamui monámona cocítaga güille. Afe güille mámece maná. Daa afe éenoracomo Aarón jigüida izoide radozi ite. Afe idozi jamai jazici radozi ónaza dúididozi. (Zícórede juzítófe izóinède.) Mei íadi Juzíñamui afe idózina éniemo riñeno, fia táinomona zicótano raire ñue llizítate. <sup>5</sup>Afe éenoraco ibáirabici emódomo mena oro finoína Juzíñamui abi imácina eroide jana naidáide. Mei íadi afe íaillinoi íaicórede. (Afe íaillinoi mámece raímona “Querubines.”) Afe íaillinoi conima uécomo eróidiaillinoi. Íaillinoi naidaina cígimo Juzíñamui cíocafírede. Afe Juzíñamuina cíóñenaza; dama ie abi egáñuana cíófirena. Afénomo faga tóiniaí díena recuffirediaíoi. Daíí recuffirediaíoi, Juzíñamui meine abido comínimo dúecaillano, íaíoimo ite fiénidífue iba íaíoimo óñeilla, ua afe ícoínia íaíoína duere fñoñeilla. Nana afe dibénemo ite duera nácidogafuaina ja birui benomo llónide.

<sup>6</sup>Afe ocuica ánoziraco nilla mei, íemo naa ie jofo ero ráaniairi fñua mei, comínido Juzíñamuimo úriraini jinóidicomo jáífrediaíoi. Afénomo íaíoimo ocuica comínido Juzíñamui íóbitalle ráaniai finófrediaíoi. <sup>7</sup>Mei íadi afe jofóidicomo, dama Juzíñamuimo úritillaíma jáífirena. Aféllaíma naga fimónaiaído dácaíño afeco jofo eromo jáirede. Faga tóiniaí díena jaca jofo úífirede. Dama íemo ite onóñeno finoca fiénidífue ícoínia daí díena Juzíñamuimo izájide. Ie mei nane nana comíni íaífue ícoínia jíáie díena Juzíñamuimo izájide. <sup>8</sup>Bífuiaído Juzíñamui Ñuera Joreño daa jíáífue na cai fidítaiacade. Afefue daide: “Baie jinóidico nai illa llezica, jofóidicomo jiba comíni jaille nai rairuírede. Ua aféruillaído jofo dama Juzíñamui illánomo jáinidiaíoi. <sup>9</sup>Nana bie Moisés illágimado nácidogafuiai birui cai onóilla canode. Ua comínimo ácatafirega raa izoide, aféruído Juzíñamuimo ánozillena nigaco, naa afe eromo íaíoi nácidogafuiai, ñue jaícina caína onótate. Biruillaído judúuai aillo faga tóiniaí jíáie fia fecaca raa diga, Juzíñamuimo nai izájífrediaíoi. Mei íadi afe bíedo íaíoi comeci Juzíñamuimo ñue jaícina jóitanide, mei íaíoi comécimo ite fiénidífueíai nai féitañegaza, fia ibaica izói íteza. <sup>10</sup>Nana afe íaíoi nácidogafuiai fia jinófene ífuiai. Niie izói íitiaíoi daide. Dárie

íaioi güille, jirole diga fímaírrillafuedo úrite. Afe izói fia emódoide múiñuafuedo úrite. Nana bífuiaí fia nano nié dino comínimo ocuica, mei Juzíñamui jíáifuena méidolliriuimo nai dúciñedeza. Ie jira aféfuiaí daa aféruillaí fena ráifide.

<sup>11</sup>Mei íadi caido Juzíñamuimo úrifireitillaímo Jesucristo, jae caimo dúcide. Afémiedo ñuera cáimafuiaí caimo zúide, mei ua nahí Juzíñamuimo ánoziracomo afémie jaináideza. Afe jaiái bíníemo ite comini niga Juzíñamuimo ánoziraco jaboide. Afécomona cai ióbillafue baimo, Jesucristo jamánomo ñuera jíllonafue, caífo monámona ana caimo zúitaíbite. Afémie afe nahí Juzíñamuimo ánoziracomo dúide; afeco bíníe comini nñega. Dama ie nahico monamo ite. <sup>12</sup>Nana comini fena, dácaíño afeco eromo ite jofóidícomo afémie jaide. Ie jaiílla llezica chivo die, juráreto jiza die diga uíñede; mei jíáifodo dama ie die uite. Mei jíi, afémie íaifuenidímiena íllamona, cruzmo cai ífomo tíllano, ie die tótado zííñona cai jíllonafue ote. <sup>13</sup>Jaiái Moisés daina izói, íaícaíllamie íemo ite íaífue bie izói muiñórede. Múíñoñegamie Juzíñamuimo dúide comini cígido macánide. Daje izói afémie Juzíñamuimo nabáirinide. Ie jira faga tóiníai die atírede. Iemo jíáie Juzíñamuimo mameca juráreto jiza jobaílla afe jízechoma atírede. Ie mei afe íaícaíllamíemo aféchoma júdaírede. Iemona afémie íaícaíñegamíena jaide. Mei jínofena muiñócaza. Ja Juzíñamui comínimo meíne abido caímare úrrede. <sup>14</sup>Mei jíi, Juzíñamui dáínamona afe tóiníai die ríírede, come jínoídífuemo muiñóllena. Afefue daíftania, ua onódicaíza. Mei Jesucristo die jamánomo ríírede. Ua dama afémie ñue nífuenidímienado Juzíñamuimo ie abí dama izáíbite. Afe ziiño Ñuera Joreño ie cánuado Jesucristo dama ie abí Juzíñamuimo izájide. Iemona ie die tótamona nana cai comécimo ite íaífuiaína muiñótate. Ua nana cai jaiáimona nícidogafuiaí caina zííñona cáatañede. Mei íadi Jesucristo díredo cai comeci múiñua mei, ua zííñona cáatagacái, afe jaca nahí caade Juzíñamui ocuícano ráiruiñeno cai jetállena.

<sup>15</sup>Ie jira Jesucristo jae Juzíñamui comue finóllífué caimo jino zúítaitímie. Afémiedo nana Juzíñamui nízécano uafue uícomo lloga zííñona cáímaduafuena maíñóritiaíoi. Juzíñamui daí nana comini jíllóillífué uícodo mamede, mei dama Cristo tíllado comini fiénidífuiaí Juzíñamui dote. Ua jaiái uícodo lloga nanoide finóllífué illa llezica, nana aféruimo afémaci fiéni finócafuaí ja birui Cristo tílla jírrari, Juzíñamui dote; duano, nana íemo íínotínona jíllotate. Daí Juzíñamuimo zííñona caímare nabáírrillafue maíñódiaíoi. <sup>16,17</sup>Afe maíñórrillafue, come tílla méífomo íitífué izoide. Dámie tíadi ie fiévide feci raa jíáímie oni llíinoga. Afémie nai tííñenia, feci raa oni llíinoítímie múnica raana nai llíinonide. Ie jira oni llíinoítímie íemo dúide raa maíñóllena, afe raa naama tílla jítaírede. Daje izói Juzíñamuimo caímare nabáírrillafue cai maíñóllena, Cristo tílla jítaírede. <sup>18</sup>Afe jira jaiái uícodo lloga Juzíñamui



ñue finóllifue táiniaruimo dífena recuíñorediaioi. <sup>19</sup> Moisés nana afe ocuica uaillai nana comínimo jino llua mei, afe uaillai cuiábicimo faga tóiniaí dífena cuirínote. Daje izóí afe mei nana comínimo cuirínote. Ua llua mei, Moisés duera “hisopo” daina raroci llífnote. Llínuano, afécimo jáirede oveja itíraína maite. Iemo jáinoína jaicuica díedo afe rarócina riáitate. Ríaitano, ocuilla uai cuiábici naa comíniri dífena cuirínote. <sup>20</sup> Cuirínua llezica Moisés daide: “Juzíñamui ómoiena ocuica ie finóllifue bie die uafue daiítate,” daide. <sup>21</sup> Daje izóí aféruillaído Moisés íaioi iniroi finoina Juzíñamuimo ánoziracomo dífena cuirínote. Daje izóí nana afeco eromo ite Juzíñamui íóbifirena raamo dífena cuirínote. <sup>22</sup> Ua, Moisés ocuica uai daina izóí jamánomo díga raa, díedo Juzíñamui dibénemo dua izóí ñue finoca. Iemona die tótañegana comini comeci faifuiaí iba jaca órede.

**Cristo dama ie abí Juzíñamuimo izájille comini fiénidifuiaina muiñode**

<sup>23</sup> Afe comini niga Juzíñamuimo ánoziraco Juzíñamui ocuide, naa afeco eromo ite ráaniairi. Iemona nana afeco eromo ite ráaniairi Juzíñamui dibénemo ite nahífuiaína jánana cai ciona izóí caina onótate. Nana bñiemo ite afeco ero ráaniaí Juzíñamui illánomo nahí itífuiaí jana. Ie jira bñiemo ite ráaniaí dibénemo figura Juzíñamui daiíllena, bie die recuille jitáirede. Mei íadi Juzíñamui nahí illánomo jáífireitino dibénemo, bie die baímo ñuera Juzíñamuimo fia izájífireille raa jitáirede, afémacina Juzíñamui iere figura daiíllena. Ua tóiniaí die baímo Jesucristo jamánomo ñuera die jitáirede. <sup>24</sup> Iemona Cristo tñilla llezica, afe Cristo bñiemo ite comini niga Juzíñamuimo ánoziracomo eromo jofo jáíñede. Afe bico fia nahico jana. Mei jíáifodo Cristo, Juzíñamui nahí illánomo caído úrillena jae cíocaizaide. <sup>25</sup> Afénomo Cristo dama ie abina, díga icaiño meine nane izájíñede. Mei íadi bñiemo ite Juzíñamuimo comínido úritillaíma, naga fimónado faga tóiniaí die uillano, afe Juzíñamuimo jáiraco jofoide iere ñuera rairuiredícomo jaide. <sup>26</sup> Afémaci jáífirena izóí Cristo jáífirena figóñede. Mei nibai afémie daií díga icaiño jáíadi, íemo énie fñuaruimona afémie afe izóí díga icaiño meine abido tírede; mei íadi afe izóíñedeza. Afémie cai illáruillaído jaiái lloga Juzíñamui finóllifue fuilla llezica, dácaiño fia cómena íficaillano caímo cíocaizaíbite. Ua afémie bñiemo cai jíáínona ie tñizaíbillado, nana caímo ite fiénidifuiái niné féillena oni dote. <sup>27</sup> Ja onóigaza, naga come bñiemo dácaiño tíide. Tñilla mei, íaioi illafue Juzíñamui jáícina jícanoite. Aféfuena daje izóí ñue onódicai. <sup>28</sup> Daje izóí Jesucristo, comini fiénidifuiái oni dóllena dácaiño tñizaíbite. Ie mei uire jíáiruido afémie fiénidifuiaina duáibiñeite; mei jaiái ie dógaza. Mei íadi afémie uafue meine dáanomo cíocaizaíbite, nana íena izire úíñoidínona jíllotano monamo ie illánomo úillena.

**10** <sup>1</sup>Mei jai ai Moisés ocuica uai naa ie lloga níciduairi, ico nirui bite caimare illífui ai jana. Afe ie lloga jáiaifue nahífueñede. Moisés bie ico zúitífue cai onóillena jana úcodo llote. Iemona naga fimónai aido faga tóiniaina íai oi úífirena, íai oi comécina figo jaícina jóitañede. Mei uáfue na, afe faga tóini ai íai oi úífirena Juzíñamuimo ánozidino nahí íaifuenidinona jáitañedeza. <sup>2</sup>Mei dai í uafue íaifuenidinona íai oi jáia di, nibai afe tóiniaina izájifirenana fáicanocaidiaí oi; mei jááfodo fáicanocaiñediaí oi, nai comécina jaícina jóoneñegai aioiza. Daje izói áfedo Juzíñamuimo ánozidino comécina íaifue na nahí nífuenidinona jáia di, nibai jae íai oi fiénidífue izire íai oimo iñede. Mei ía di íai oi fiénidífue jaca izire íai oimo ite. Iemona onódicaí, tóini ai fecáfirena íaifue na figo doñede. <sup>3</sup>Mei ía di afe fatá Juzíñamuimo izájitaga tóiniaina ciónamona, comini íai oi fiénidífue naga fimónai aido úbicaitagai aí oi. <sup>4</sup>Mei jii, juráretuai, chívuaí die díga, jaca come fiénidífui ai dónide. Mei áfemo ua dolle ríno iñédeza. <sup>5</sup>Ie jira Jesucristo bíniemo bícana llezica ie Moo Juzíñamuina daide:

Omo fia fecaca faga tóiniaina gáñedioza, comínina iere figura o dai llena.

Mei jááfodo énie cómena ja cuena jécitaitio.

Afemona cue tñilledo íai oina óiena nífuenidinona jáitaiticue.

<sup>6</sup>Ua comini íaifue ícoinia jobaica tóini ai ja birui ona ióbitañede.

<sup>7</sup>Ie jira cuegánico cuedo úrilla izói birui ona daidicue:

“Moo Juzíñamui benó bíniemo o comeci jítáillafue fñuaíbiticue,” daide.

<sup>8</sup>Nano fueñe afémie daide, nana afe Juzíñamuimo fia fecaca tóini ai, íaifue ícoinia jobaica tóini ai díga Juzíñamui comécina zuitañede.

Ua íena ióbitañede, nana afe nícidogafue jai ai ocuilla uai daina ía di.

<sup>9</sup>Afe emódomo Jesús daide: “Moo Juzíñamui, ja o comeci jítáillafue birui benomo fñuaíbiticue.” Dai í Juzíñamui nana afe jai ai ocuica nícidogafui aina zóofete. Zóofiano, afe méifomo Cristo dama ie abi cruzmo izájillafue Juzíñamui jeire ote, ñue comínimo caimare érocaillena. <sup>10</sup>Dai í Jesucristo, ie Moo Juzíñamui comeci jítainafue izói finode. Dai í ie fñuamona jae dama Juzíñamui nabaina ñue finócamacina jáidicaí. Mei jii, Jesucristo dácaíño jaícina nana cai fiénidífue oni eneno féitate. Mei ninomo féiñeitena cruzmo dama ie abi Juzíñamuimo izájideza.

<sup>11</sup>Naga judío Juzíñamuimo comínido úriraima nágaruillaído naidáillano daje izói faga tóiniaina Juzíñamuimo izájifirede; mei ía di afe rñilledo comini íaifui ai dónide. <sup>12</sup>Mei jááfodo Jesucristo dácaíño comini fiénidífue ícoinia duere zefuida, tñizaíbite, afe izói dáanommo íñeillena. Ie tñilla mei meine abido cáaillano caifo monamo Juzíñamui nabézimo ráinazaide, nana comini íaifue múiñuana fuilla jira. <sup>13</sup>Dinomo, nana ie

fairíconi ie anamo íaioi itábicaillena afémie úiñoide. <sup>14</sup>Mei jii, Jesucristo, dácaño ie Moo Juzíñamuimo ie abina izájide. Afe izájillafuedo, nii cruzmo ie tíllamona, nana caina ie nabaina ñue finode. Jae nana cai comeci íaifuenta ñue múiñuano jaca ninomo caimo caimare érocaide. <sup>15</sup>Aféfuego Juzíñamui Ñuera Joreño uaina nabáide, iere uafue cai daiíllena. Ñuera Joreño Cuegáuaimo daide:

<sup>16</sup>Juzíñamui daide: “Uire jíáiruillaído cue comínimo bie izói jíáie como cue finóllifue llóitícue, naa jíáie cuemo ínotinori.

Aféruillaído cue ocuica uáillaina íaioi comécimo jaícina onótaitícue. Ua afe uailíai íaioi ífócimo ñue jino denótaitícue,” daide.

<sup>17</sup>Ie mei nane emódomo daide:

“Nana íaioi fieni finócafuaíi ibana otátañeítícue.

Daií oñena llezica, íaioi comécimo ite íaífuaína jaca niné féitaredícue.”

Dinori Juzíñamui daide. <sup>18</sup>Nana comini fiénidífuiaí daií dua mei, jíái íaífue ícoínia dóllena fatá fecaca tóiníai jae jítañega.

### Juzíñamuimo cai áinozillena jítaírede

<sup>19</sup>Iemona, ámatíai, cácarei. Jae Juzíñamuimo cai jíallio uáfodo túide. Ua ie nahí illánamo, afe iere ñuera rairuícacomu caimare jacíruíñeno íemo úrizairedícaí; mei Jesús caíri tízaíbillano caina Juzíñamuína éoitadífue oni muiñócaza. <sup>20</sup>Afémie tuiñoica io ñuera rairuíredíco jédaciede íbáíraroido joide. Jira Juzíñamui illánomo cómena cáataite comue io Jesús tuiñuano, afe iodo afémie caina ífode. Afe io tuiñóllena dama ie abí izi cácatate, íemo cruzmo duere zefuírede. <sup>21</sup>Iemona Jesús nana Juzíñamuimo ínotínodo Juzíñamuimo Uritíllaimana jae jaide. <sup>22</sup>Afémie ja caíri úríoinamona, maí Juzíñamuimo jacíruíñeno omoi ánoziri, mei íemo ñue cai ínuamona jae meáíruíñedinona mamécacaíza. Ie jira jífuenide comécido, maí omoi ánoziri. Ánozillano, maí íemo caimare cai úrillí. Ua táinona lloñeno maí íemo comeci caí facallí. Mei nana caí íáírede comeci ícoínia afémie jae jaícina oni féitagaza; ua come abí ñue jáínodo jocoína izói comécina muiñócaí. <sup>23</sup>Afe uáfodo jino comínimo caí lloga Juzíñamuimo caimare caí úrillafuena, maí fáícanocaiñeno áfemo izire caí ínofíreíllí, mei afefue caimo llotímie Jesús jaca ínofíregamíeza. <sup>24</sup>Daje llezica illa dígamíerie, maí conímamo ñue caí comécíllí, conímama caí izíruíllíno caí jenóllena. Daje izói jíáímana ñúefuaína rairuíñeno jíeruíllínona jenóredícaí. <sup>25</sup>Daje izói omoi Juzíñamuimo gairífirenafuena maí féitañeno iri. Dáarie aféfuena féitafíredíai. Daií illa fiénide. Mei jíáífodo, Jesucristo meine billíruí raíre dúciacanana omoi onónamona, maí conímama ñue úrillauaído comécina caimare caí náireítallí, nana caí ínogafue féíñellena.

<sup>26</sup>Juzíñamui llogafue daide: Jaca dama Jesús tíllamo caí ínuamona jílloredícaí. Aféfuena caí ie onótaja mei, mei íadí afe uaina nai caí

ruifruioiadi jae abi dine jiáie cai íaifue múiñoitena iñede. <sup>27</sup>Daí ruifruioidimacimo jamánomo izire jácifue zúite, mei Juzíñamui duere íaioi finóllifue mo jae ánozideza. Afémie iere íaioimo rícaillano iere boode jiáifodo joide iraimo íaioina duere zefuítaite. Ua nana Juzíñamuina bacáuairedinona irai amena cuarita izóidemo, Juzíñamui íaioina dinomo zíñona duere zefuítaite. <sup>28</sup>Moisés ocuica uaina ruifruitimiena raire titádiaioi. Ua, mena nibai daámani uai nabáiraini daina uáimona, íemo dúecaiñeno íena titádiaioi. <sup>29</sup>Mei Moisés ocuica uaina ruifruitimiena daí duere finóbiteza, Juzíñamui Jitona ruifruitimie mo jamánomo izire duere finóllifue, afémiemo zúiteza. Afémie Jesús díena jámairuitimie. Afe tíllamo totaca díedo, afémie nauí dácaño Juzíñamuimo oni eneno nizécamierna jaide. Mei íadi Jesuna ruifruitimie caimo dúecaiñede Ñuera Joréñona íaire daíñiredimiena jaide. Daí ítimiena iere Juzíñamui duere finórede. <sup>30</sup>Ja birui daí ítmie fiénidífue iba ófiredimiena onódicaí, nímie cai Moo Juzíñamuina. Afémie daide: “Afe iba ófiredimiedicue. Ua nana íaifuiái íbana duere finótañiredimiedicue,” dáideza. Jiáinomo Juzíñamui Cuegáuai daide: “Juzíñamui ie comini comeci ífuenta jaícina jicánoite. Jicánuano íaioimo dúide duere finóllifue ócuite,” daide. <sup>31</sup>Daí ie úrillana cai onónamona, caade Juzíñamuimo duere finóllena izájina jamánomo jacírede.

<sup>32</sup>Mei íadi nauí íanori omoi illáfuemo uibfoiri. Aféruimo ñúefuena omoi onona mei, aillo duere zefuúdiomoi, mei íadi aféruimo omoi íinogafue fáicanocaiñeno ñue ocuúdiomoi. <sup>33</sup>Dáruillaído uáfori comini eróicana báíñuano duere finócaomoi. Jiáiruillaído daí finócamacimo omoi nabáíllamona duere zefuútagaomoi. <sup>34</sup>Afe llezica llaveca ámatiaimo dúecaiñerediomoi. Afe baimo, ómoimo ite ráaniaina jiáímaci báiruana caimare rairuúñediomoi, mei onódiomoiza, biniemo ite raa baimo, jamánomo ñuera jaca bairónide raa ómoiena monamo íteza. <sup>35</sup>Ie jira nauí izire omoi íinoga uaina mai birui omoi féitañeno iri. Aféuaina ñue omoi íinofíreiri, mei ícoimo iere ñuera jirídoga ízoide raa máíñoitíomoiza. <sup>36</sup>Juzíñamui jítainafuena omoi jiéruilla llezica raire comeci járidoñoño írediomoi. Ua, omoi íinoga ñúefue, omoi are jaícina llocana uille mei, Juzíñamui uícodo lloga caimare jíllonafuena máíñoitíomoiza. <sup>37</sup>Mei jii Juzíñamui Cuegáuaimo daide:

“Ja íanori íllamona, uícodo lloga bíitimie Jesucristo, jizíñeno raire dúcizaíbite.

<sup>38</sup>Afémie nai biñena llezica, nífuenidena cue mamécamié, cuemo ie íinuado nágaruillaído caimare ie illano, cuena íóbítaite.

Mei íadi afémie afe ie íinoga uaina meine abido féitaiadi, afémieri íobiñeíticue,” dinó Juzíñamui daide.

<sup>39</sup>Mei íadi meine abido féitatino dibénemo jaináíñedicai. Afémaci daí íaioi íinoñenamona jílloneítiaioi. Mei jiáifodo cai bie Jesucristomo íinotínodicai, daí dani cai jíllotagacai.

### Juzíñamuimo cai ñnuafue

**11** <sup>1</sup>Mei ¿minica ñnuafuena? ñnuafue Juzíñamui daina uaina jeire cai uafue. ñnuamona cai úiñoğa cáimafue jeire cai ollónona onódicai. Daje izói Juzíñamuimo ñnuamona, ie lloga cáiena mameca ñuera raa ciónena íadi, afefue ua íllana comécido ua onódicai. <sup>2</sup>Ua, ñnuafuedo judíuai jaiáidigimamona Juzíñamuimo jaináidimiai, Juzíñamui comeci jítaillamacina jáidiaioi.

<sup>3</sup>Juzíñamuimo cai ñnuamona, Juzíñamui ie úrilla uaido bínie ñnuana onódicai. Daií ie ñnuado nana bie cai ciona énie, táinomona Juzíñamui comúitate. Ua, minícana inédeza ciónena ráamona naga ráaniai comúibcaide.

<sup>4</sup>Juzíñamuimo ñnuano Abel, Caín fecaca baimo, ñuera Juzíñamui ióbitalle raa fécaibite. Iemona Abel Juzíñamui dibénemo jaícina itímiena jaide. Juzíñamui jiéruigamiena jaide. Mei Juzíñamui Abel fécaibiga raa llínuamona, Juzíñamui comeci Abelna jítainana onódicai. Daií Juzíñamui íena jiéruillafuedo Abel jaícinaidifueмо Juzíñamui uai nabaide. Afe Abel, jaiái uécodo Juzíñamuimo ie ñnuado ñue illáfuedo jaide. Aféfuena cai fídiamona, afémie titácamié íadi, ie ñnogafue, úrillaui izói caimo úrite. “Juzíñamuimo ñue cai ñnolli,” caína daide.

<sup>5</sup>Iemo Enoc Juzíñamuimo ie ñnuado tíñeno caifo monamo uiga. Daií tíllana ie óñoñeillena, cáanori monamo Juzíñamui uiga. Afe mei afémie bíníemo ciónenamie, mei afémie Juzíñamui úigaza. Afémie nai úiñega Juzíñamui ióbitadimie dainámie. <sup>6</sup>Mei jii, Juzíñamuimo cai ñnoñenia jaca íena ióbitanidicai. Dáamie Juzíñamuimo áinoziacania, Juzíñamui nahí illánona uécodo ie ñnolle jitáirede. Nane íemo nana izire íena onóiacadino, ñue ibana dama ie abi ífuena íaioina onótaite. Aféfuemo uécodo daje izói ñnorediaioi.

<sup>7</sup>Daje izói Noé, Juzíñamui lloga raire biite nai ciónena duere finóllifuenta fídiano Juzíñamuimo ñue ñnote. ñnuano áillue jofóredicae finode, áfedo nana dama ie cominí daií jíllloillena. Noé daií dama Juzíñamuimo ñnuado, nana jíáie ñnoñede comínimo duere finótatiuai jino íaioimo llote. Afe izói Juzíñamuimo ñnuado Juzíñamui comeci jítaina nífuenidimiena jaide.

<sup>8</sup>Afe mei jaiáidiruimo Juzíñamui Abrahana jíirite, jíáie éniemo jaiánillena, áfeniena ico jíáiruideo íeiena maiñóllena. Abraham Juzíñamuimo ñnuamona afe jíirilla uaina cacáillano, raire ie illániemona oni jíáinomo jáizaide, ie dúciillino nai óñoñega íadi. <sup>9</sup>Abraham nai Juzíñamuimo ñnuamona, Juzíñamui íemo fecáacaiga éniemo fia jicánemiema diga fimona fia ite. Ua, iniroi niina úicaiífrega jofomo aféniemo are íoide. Daje izói Abraham comúitaga jító Isaac, dinómona Jacob diga afénomo daje izoide iniroi nillácuaímo are itífaillinoi naa

ie comíniri. Juzíñamui daje éniena fecalle uaina Abrahamo llua izói, afe íaillinoimo úcodo llote. <sup>10</sup>Ua Abraham afe jamai illácuaimo dama íeieñede éniemo caimare íoide. Afémie caimare ite, mei Juzíñamui dibénemo ite caimare táinocaitanide illínomo dúciillena afémie úiñoideza. Afe caimare illico Juzíñamui mamérillano dama ie uaido niga.

<sup>11</sup>Daje izói Abraham ai, Sara, Juzíñamuimo ínuamona, jamánomo jónaite íadi, fueñe úruerena ríino ote. Iemona daa jító jocode, mei Juzíñamui aféngona aféfuena úcodo daina uai, afengo iere ñue ínoteza. Afengo bie izói daide: Bímie ie daina uaina jíáífo méidofinidímie. <sup>12</sup>Iemona Abraham iere jónaite íadi, iere aillo erófene igímaiaina jebuítate. Ua jamánomo díga nairai jebuide; ñí ja lloga monamo ite facádonide úcuai izói itífaioi. Nane monáillai fuédamo ite facádonide guamai izói jebuídíaiioi.

<sup>13</sup>Nana cai lloga comini Juzíñamuimo nai íaioi ínoina llezica tídíaiioi; nana Juzíñamui úcodo lloga ñúefuiaina nai llíñoñediaioi, tílla. Mei íadi afe lloga ñúefuiái ico jíáiruimo zúillena jicana fidídiíaiioi. Fídiano caimare aféfuemo ínuano comécídiíaiioi, mei bñiemo óñoñega jicánemacina íaioi illa raire méaicaiñeno llotíaiioiza. Uáfuena bñiedo jaiánicana jáidíaiioi. <sup>14</sup>Nana daí llotino, dani íaioi nahí illínomo íaioi jáiacanana llotíaiioi. Ua jíáie éniemo jáillana íaioi úiñoínana caina fidítate. <sup>15</sup>Daí íaioi dáinamona, mei ñibai jaiái íaioi illániemo comécídiíaiioi. Daí íaioi comécíadi díga icaiño meine abido afénomo jáirediaioi. Mei íadi abido afénomo jáíñediaioi. <sup>16</sup>Mei jíáinomo comécídiíaiioi. Jíáie jamánomo ñuera illánomo, monamo ite Juzíñamuimo nabáírizaillínomo izire úiñooidiaioi. Daí Juzíñamuimo íaioi ínuamona, Juzíñamui iere íóbite. Bie jaiánicana jáidíno Juzíñamuina dáíadi: “O cue Juzíñamuidio,” daí íaioi dáinari Juzíñamui méaicaiñede. Mei íaioi jofue izoide ñuera illino, dínomo Juzíñamui díga zíñona nabáírizaillena, Juzíñamui jae finócaza.

<sup>17,18</sup>Nauí Isaac jocoina llezica Juzíñamui Abrahamana daide:

“O úicoitígima bie jító Isáacimona aillo jébutiaioiza,” daide. Díga iruillai íllamona Juzíñamui dáaruimo Abrahamana ínuafue facátate. Iemo Juzíñamui ocuilla izói, Abraham nai Juzíñamuimo izire ínuano, ie jító oni uite, tílada Juzíñamuimo fecállena. <sup>19</sup>Mei Abraham Juzíñamuimo ñue ínuano comeci facade: “Juzíñamui jamánomo ñue ríinoredímie; tíide come meine cáataite ríino íemo ite. Cue jító tíidena Juzíñamui meine íena cáatarede,” daí Abraham comeci anado daide. Iemo, Abraham ie jítóna fáiacana llezica Juzíñamui afémiemo raire úrillano, ie daade jítóna jíllotate. Abraham ie jítóna fañede. Ie jira jíáífodo daírede, tíllanomona Abraham ie jítóna meine abido ote.

<sup>20</sup>Daje izói Juzíñamuimo ínuamona Isaac ie jító íaillínoí Jacóbomo Esaú díga uire Juzíñamui orelle caimátaillífue ua llote.

<sup>21</sup>Daje izói Juzíñamuimo ínuamona Jacob, ie tíizaillíruimo José jító íaillínoimo úrite. Urillano ie enaize íaillínoimo uire Juzíñamui

orelle caimátaillifue jino llote. Afe llezica ie macara jígüida llínota ie abi mozíñuano caimare Juzíñamuimo úrite, ie ióbitallena. <sup>22</sup>Daje izói Juzíñamuimo ñnuamona José ie tízaillirui áinozillano, Israel comini Egipto éniemona uire oni dani íaioi éniemo jáillifue llote. Afe llezica ie ícuruai aféniemo fiéñeno oni úllena, úcodo uai íaioimo jónete.

<sup>23</sup>Díga fimona jailla mei, Egipto ríllaíma nana Israel como jéiciga jitótiaina fazítate. Mei íadi Moisés jocoina mei, ie moo íaillinoi Juzíñamuimo ñnuamona, illáimana jacíruiñeno Moisená retáidotiaillinoi. Dauíamani íena retáidotiaillinoi, afeza íere ñézana jira. <sup>24</sup>Aféllaíma jiza Moisená náamataja mei, Moisés móonaílla llezica Moisés aféngomo dúillana ruifruite; mei afémie Juzíñamui dibénemo jaináideza. Ie jira Juzíñamuimo ñnuamona Moisés afe mámece oni faite. <sup>25</sup>Mei jíáfodo Juzíñamuimo jaináidino cígiri íllana, afémie jamánomo gaide, nana duere zefúdiaioi íadi. Daje izói ie comínina fiene ie zóofiamona raire féite jabo ióbillafue dibénemo íllana afémie gáíñede. Moisés Juzíñamuimo ñnuano ñue coméciide.

<sup>26</sup>Bíedo afémie coméciide: “Nana Egipto énie ebírede ráaniai baímo, Juzíñamui dibénemo ie dámie illa jamánomo ráifide, duere afémie zefuide íadi.” Afémie daí comece facade. Ua Moisés, Cristo ícoína zefuíllano, féitañeno daí coméciioifrede; mei Juzíñamuimo ñnuamona baímo ñuera féinide raa izóidifue afe ie jirídollena afémie onódeza. <sup>27</sup>Iemona Moisés Juzíñamuimo ñnuamona, afe Egipto illáímamo íte ríinona jacíruiñeno Egíptomona botade. Ua jacíruiñeno afe Moisés oni jaide, mei buna cíóñena Juzíñamuimo fáicanocaiñeno ñue nágarui coméciifredeza. Daí íe comécinamona, údo cíónamiemo ínuá izói, Moisés Juzíñamuimo íere ínote.

<sup>28</sup>Daje izói Moisés Juzíñamuimo ñnuamona, Juzíñamui lloga pascua rafue como fueñe finode. Ua Juzíñamui llua izói, Moisés íaioi jofóniai naze fuédamo oveja díena jíritate. Daí ínuamona, Juzíñamui oreca títaite abi ímie nana Israel nano fueñe jococa jitótiáiaimona buna titáñede, aillo Egipto imaci jitótiai tícoizitiaioi íadi. <sup>29</sup>Daje izói Juzíñamuimo ñnuamona nana Israel aillo comini “Jíairede” daína monáillai ñue zaférede iodo ruícafenemo jaitádiaioi, mei afe monáillai jainoi Juzíñamui oni gaitácaza, íaioi ruica jáillio tuiñóllena. Mei íadi Egíptomona racáidino afémaci jailla izói jáidiaioimo, meine ío jáinoina íbáibicaillari coróbaitiaioi.

<sup>30</sup>Iemo Israel comini Jericó jofue anáfenoacadiaioi. Afe jofue riire naidároga noíñbanina cirínoga. Iemo Juzíñamuimo ñnuamona íe daína izói, siete dígarui afe riire íbaica jofue jinófenedo ífoína macáoidiaioi. Iemona ícoi iruimo afe caífo nitaca noíci íinoina jofue jinófene cirínubani, Juzíñamui ana éniemo caitade. <sup>31</sup>Daje izói Juzíñamuimo ñnuamona nauí úcodo fiénidíngo, Rahab fañega ,nana jíáie afe jófuemo

ite ñinoñedino fazícaicíoí íadi; mei Juzíñamui comínimona oreca éniena ñue onóillena méiñoitinona afengo caimare cánuano jofu uáidoteza.

<sup>32</sup>Nai jino lloñega aillo ite jiáie jaiái Juzíñamuimo ñinofiredino. Bibedo íaíoi illáfuiaina cue llóllena cue abi juánideza, nana llónidicue. Fia íaíoi mámečiai jino llóiticue, íaíoi mo omoí ñue comécioillena. Afémaci Gedeón, Barac, Sansón, Jefté, David, Samuel; daje izóí Juzíñamui uai jino llóraini ite. <sup>33</sup>Bimácimona dámerie Juzíñamuimo ñnuamona jiáie náiraina anáfenodiaíoi. Jiáimaci Juzíñamuimo ñnuano Juzíñamui jaícina jóidífueña comínimo ocuide. Dáarie Juzíñamuimo ñnuamona ie uícodo llua izóí, Juzíñamui canócaiaíoi. Dáarie Juzíñamuimo ñnuamona riírede jánallarillai fueña ibaica izóí finode, íena íaíoi rñeillena.

<sup>34</sup>Jiáimaci uzírede iraimo dotácaiaíoi ia, nai Juzíñamuimo íaíoi ñnuado afe iráimona uzíñeno jino bitíaiíoi. Dáarie Juzíñamuimo ñnuamona fuírllafuiamona otábiñeno jino ñue jíllodiaíoi. Iemo jóbairo illa llezica Juzíñamuimo ñnuamona dáarie mairñedimiiai ñue márimiaína jaide. Daií Juzíñamuimo ñnuamona onina bite fuírírainina abido rainódiaíoi. <sup>35</sup>Daje izóí Juzíñamuimo ñnuamona dáarie ringóniaimona íaíoi úruiai tíide íadi, meine abido íaíoi mo cáataga.

Mei íadi jiáimaci nai Juzíñamuimo ñnuamona llezica, íbátarede tíide jíllotafueña lloñediaíoi, mei aféfuado Juzíñamuina jáanotaiticai, daidíaiíoi, íadi Juzíñamuina jáanotanidiaíoi. Ie jira iere duere zefuítano titácaiaíoi. Daiítadena lloñediaíoi; mei afémaci meine abido caana mei, jamánomo ñuera zíñona illáfueña méaicaiñeno maiñóacadiaíoi. <sup>36</sup>Nai jiáimaci Juzíñamuimo ñnuamona llezica, fiénide zánonafuiaimona duere finóbidiaíoi. Jiáimaci riire zechénogaiaíoi. Ua dáarie Juzíñamuimo íaíoi ñnuamona cúinajano llavécaiaíoi. <sup>37</sup>Daje izóí jiáie Juzíñamuimo ñnotino noficiaina nójicaiaíoi; jiáimaci dáafemiiaido amena dera izóidedo ñetácaiaíoi; jiáimaci caimare taino uáillaido bífuegaiaíoi, íaíoi ñnuafue facátallena, íemo lloéfaido fagáiaíoi. Jiáie Juzíñamuimo ñnotino, íaíoi iníroinina jira, tóica rille igóraini jítaíodiaíoi. Daií fia macáoidiaíoi, mei jofónidiaíoi. Ua iere ráanidiaíoi. Ie emódomo duere zefuítano iere fiene finócaiaíoi. <sup>38</sup>Daií finócaiaíoi íadi, Juzíñamuimo íaíoi ñnogafueña fáicanocaiñediaíoi. Iemona bimaci Juzíñamui dibénemo iere izíruigano; mei íadi bíniemo ite ñinoñedino afe Juzíñamui uaina jeire otínona jámairuitiaíoi. Ie jira ñnotino afe ñinoñedimaci cígiri illena, ñinoñedimacimo figo dúíñede, mei ñinoñedimaci comeci iere íairedeza. ñnotinona jámairuillano, íaíoi oni jíúfirediaíoi. Iemona ñnotinomona dáamerie zaféredizicimo jáidiaíoi. Jiáimaci caifóneduai illánomo botádiaíoi. Iaiíoi jaillánomo ite ífuaimo ífirediaíoi, naa íduai ana ífuairi. <sup>39</sup>Nana bimaci Juzíñamuimo ñnuamona, ñue “figora” daínamacina jáidiaíoi. Mei íadi nana Juzíñamui uícodo lloga caimare ñue illáfuiaina figo maiñóndiaíoi; jabo maiñóndiaíoi. <sup>40</sup>Mei Juzíñamui jae uícodo



cai canolle jamánomo ñuera cáimaduafue mamédeza. Afe jamánomo ñuera cáimaduafue Jesucristodo cai nahí cai jílloillifue. Daií jaiái ua Juzíñamuimo ñnotino naa cai diga, birui dáanomoi jaiái Juzíñamui mameca nahí jílloillifuemo dúciiticaí. Ua afémaci naa cai diga, Juzíñamuimo caimare nabáirillafuena jeire óiticaí.

### Jesumo ñue jaícina omoi comécioiri

**12** <sup>1</sup>Ie jira, cue ámatiaí, comécido ñue omoi facari. Ua aillo jamánomo Juzíñamuimo izire ñnotino biniemo cai úcodo macáoidiaioi. Afémaci Juzíñamui cai ióbitallifuena caina ifode. Afémaci cai ñnogafuemo jaícina ifoite uai nabáiraini. Cai abido ífoina itífoi. Afémacimo cai comécillamona, nana cai jízitacana uite fiénidifuiái mai oni cai féitalli. Ua, caimo ite fiénidifue, abi llótaidote iniroi izói caimo jíide. Jíinamona jaca caina aruire itátate. Afena fáicanocaillano, Juzíñamui ióbitallifuemo zefuúruíñeno mai izire cai nícidolli. <sup>2</sup>Afe llezica duere cai zefuúllano féitano, mai Jesumo comeci cai facalli; mei afémie Juzíñamui ióbitalliodo, ñnuafuedo cai jáillena cai ifódimeza. Mei afémie ie Moo Juzíñamuina féitañeno ie fáainaruimo nai íemo izire ñnoide. Daií ie ínuua, afémie izói jaícina cai ñnollena, afémie cai ifode. Iemona afémie cai ñnogafue ñue ícoimo fuitádimie. Ua, Jesús duere zefuide, íadi afe duere zéfuilla méifomo íte cáimafuemo, afémie ñue comécioide. Afemo comécioillano uái dáii cruzmo tñizaide; mei áfedo nana íemo ñnotino caimare jíllobicaitiaioiza, afémie onode. Iemo afe meárede tñillana náfueneño, abido meine cáadimiéna jaide. Afe daií jaillano caifo Juzíñamui nabézimo Jesús ráinazaide.

<sup>3</sup>Ie jira, cai jíainona duere zefuítagamie Jesumo mai ñue omoi comécioiri, omoi duere finóbicaillamona omoi zefuúruíñeillena. Daje izói Jesumo ñue omoi uibíoiri omoi comeci ñue náireillena. Mei afémie fáicanocaiñeno Juzíñamuimo ñnoicaide, fiénidino íena uáitajano duere ie finódiaioi íadi.

<sup>4</sup>Fiénidifue omoi comécina jíirioide, íadi nágarui áfemona abi ráiruifirediomoi. Afemona abi ráiruúllano iere Juárezde. Iemona jabo duere finócaomoi. Mei íadi fiénidifuena omoi anáfenocanamonai tñínediomoi. Dama Jesús ícoínia jabo duere zefuúdiomoi. <sup>5</sup>Afe llezica Juzíñamui caimare llogáuaina nibai jae féitatomoi. Aféuaido Juzíñamui ie úruiaí izói, ómoína llófuete; ona riire daide:

“Cue jító, o Ocuíraíma Juzíñamui omo oreca duere zefuítajafuena jámairuñeno iri, mei áfedo afémie ñue ona ráiruúllano lletádeza. Daje izói fiéni o ñnuamona afémie duere o finóadi, comécina ríinidimie izói íñeno iri.

Mei jíáifodo, abi máimiano, ie llétafuena ñue jeire oíri, ñúemiena o jáilleza.

6 Mei Ocuíraima Juzíñamui nana ie izíruiganona fíaicana lletáfiredeza, íaifuenidinona íaioi jáillena.

Afe izói nana ie ua onoiga jitótiaina llorebai mailla izói due ízitate, mei afémaci dama íeieza,” daide.

7 Omoína izíruillamona Juzíñamui afe daíí ómoína duere zefuítate, ómoimo llófuellena, baimo ñuera ie jitótiaina omoi jáillena. Ie jira duere zefuítagaomoi. Mei onódiomoiza, biniemo ite moo llétañega jitó ñue móonaiñeiteza. Iemona afe moo nana ie jitótiaina llorebai mailla izói ízitate. 8 Ie jira Juzíñamui ízitañegamie nibai ie nahí jitóñedeza, móonidiza; mei nana nahí ie jitótiai izi cácatagaiaioiza. 9,10 Afe emódomo cai biniemo ite móotiai nauí ñue cai móonaillena, ñue comeci íaioi fácamona, izire caina lletádiaioi. Ua nano íanori illáruillaído caina duere fínuafuedo lletádiaioi. Ua izi cácatagacai. Afe llezica nai cai moona caimare jacíruiticai; jacíruioillano ñue íaioi anamo itábicaidicai. Daje izói cai monamo ite Moo anamo jamánomo caimare itábicairedicai; mei afémiemo cai fínuano, nahí ie jitótiaina comútagacaiza. Nana afémie duere cai fínuafue cai dibénemo aillo ráifide, afémie ebire ñuera illa izói, daje izói cai íllena. 11 Ua, ja onódiomoiza nana izi cácatafueo illa llezica, áfena gáñedicai. Mei íadi afe izi cácatafue záilla mei, áfedo lletácana, Juzíñamui anamo ñue jafína íficaillano, comécina jacíruíñedinona caimare jáiticaí.

### Juzíñamui uaina ruifíruilla iere jacírede

12 Juzíñamui daíí omoi llétajana omoi onónamona, mai abí omoi mame. Ja abina náinidino izói omoi iñeno iri. Omoi zúurede comeci náiretari. 13 Afe llezica omoi duere zefuíllafueo, mai bífueo jaícina comeci facádori. Aféfuedo daííri “Juzíñamui íóbillé jitótiaina móonaitagacai.” Daíí o dáinamona, jíáie ómoimona Jesumo íinogana féitaacadino, comécina caimare náiretaitio. Daíí ie náireillamona afémie meine abido Jesús uaina izire ínocana jeire óite.

14 Afe emódomo nana comíni cígiri, mai comeci rícaitañeno cáimafueo omoi iri. Daje llezica, Juzíñamui ebire ñue illa izói, afe dibénemo mai omoi abí ífuiái nágarui méidocana uiri. Bie izóidífueo omoi nai inéniadi jaca buna Juzíñamuina cóñeille. Mei íadi comeci íaininafueo cai íadi, íena cóiticaí. 15 Juzíñamui caimo fecaca cai ie cánuafe aillo ite. Bifue nana jeire omoi ófireilleza izire omoi coméciri. Daíí íllamona buna fiénidífueo oni nibéfodo báíñeiteza. Daa daíí oni fiénidífueo dibénemo baíídimie nana jíáimaci comécina fiéni finode. Mei jíi, duere zefuíllamona Cristo dibénemo figo jaináiacañedimie, jucúrede juia izoide. Mei afe juia illemo totáa, nana áfeji jucúredjina jaide. Daíítade come nana ie aino comínina daje izói figóruíñede. Afemona abí omoi rairuiri. 16 Daje izói nana jiruírenafuiaimona abí omoi rairuiri.

Afe llezica ómoimona dámie Esaú illa izói iñeno iri, mei afe Esaú jaca Juzíñamui jítainafuemo figo coméciiñedeza. Aféfuena jámairuillano, afémie nánoramie íadi, íemo ite maiñórilla ríino, fia due jiza güille ibana fecade. <sup>17</sup>Afe Esaú illáfueña ñue onódiomoiza; mai aféfuemo omoi comécioiri. Ico íirairuimo ie moo ézicirafueña Esaú maiñóacade, íadi ie moo ja íena ruifíruite. Afémie comeci ífue méiduano éecana ie moomo izire jicade; íadi “Jii” daiñede. Afe nauí Esaú jámairuillafue jaca méidonide.

<sup>18</sup>Ja birui Juzíñamuimo caimare nabáirillanomo dúciðiomoi. Jaiai Juzíñamui comini áillue caifónedumo áinozidiaioi, Juzíñamui daina uaina cacáillena. Afedu mámeceí Sinaí. Afedu náaduna irai izói boode, aillo úillie diga. Afe llezica iere jacire nairíbicaide. Nairíbicaillano, jairifo riire jaiñode. <sup>19</sup>Aféruimo bainada izoide ficire cácaide. Afe llezica áillue come úrilla uai íaioimo ficire cácaide. Afe uai iere jacírede cacaide. Afemona, áfena cacáðino jíáie emódomo lletara uaina llóñellena izire jicádiaioi. <sup>20</sup>Afe íaioi cacana íaioimo lloga lletara uai jamánomo iere juáredeza. Aféuai daide:

“Bie óode íduna omoi jetáiñeno iri. Ninena daa rille bídumo bíadi, raire nofciaido fáiri. Daje izói ninena bídumo bite come fáiri,” daide.

<sup>21</sup>Uafue, afe cacánafue naa cfocaidífue diga iere jacírenamona, dama Moisés uai ua: “Aferi iere jacínaiticue. Jacíruillano cuidfriticue,” daide.

<sup>22</sup>Mei íadi, jae jíáifodo Jesucrístomo omoi ínuamona, ja birui Juzíñamuimo ite jacínide caimare nabáirillafue díbénemo dúciðiomoi. Ie mei ícoimo monamo ite jaca caade Juzíñamui uícomo úrizaitiomoi. Juzíñamui illa jofue, “mona ero ie Jerusalén” mámeceirede. Iemo jíáifodo “Sión Caifónedu” daina. Afémiemo ja omoi caimare nabáirillamona diga íeza facádonide Juzíñamui abi imaci Juzíñamuina íóbioicana iráizitiaioi. <sup>23</sup>Ua, omoi ínuamona Juzíñamui ómoína daide: “Ja cue daade Jitó Jesucristo izóidínodiomoi. Cuemo ie dúina izói, afe izói ja cuemo jaináidiomoi,” daide. Afemona nana Juzíñamui íena comuítagamacimo jae jaináidiomoi. Nana afe íemo jaináidino mámeceiai jae monamo cueda. Ie jira nana Moo Juzíñamui ie comuítaganona, ñue jicánuana fibíðimie izói, ñue íaioína ríidoite, mei afémie nana nairai Mooza. Jaiai ie anamo ñue itino, jae tíðiaioi, mei íadi íaioi ñuera joreño nai figo caimare inéðiaioi. Ja biruíllaido Cristo cairi tíillano caina jíllotate. Daií nana íemo ínotinona jíllotano, afe tíðino ñuera joréñuai ñue jaícina caimare itátagaiaioi. <sup>24</sup>Uafue, Juzíñamui comue caimare caimo fecállifue caimo llóiacade. Afefue caimo lluíábitimie Jesús, mei ie cruzmo ie ðie tótajado caimare íaifuenidínona finócacaiza. Ie jira ie ðie, úrilla uai izói jamánomo ñúefue cai ífócimo denode. Mei jíáifodo Abel ðie tóilla afe izói caimare ñúefuai caimo lloñede.

<sup>25</sup>Nana bie caimare Juzíñamui caimo llotátagafuiaina jae onódiomoi. Afena omoi onónamona, afefue ómoimo llotímie mai omoi ruifíruiñeno iri. Afe íena ruifíruillamona abí omoi rairuiri. Mei jaiiai bíníemo Juzíñamui jónega lletáraima dáinana ruifírunitino, duere íaioi finóinamona jaca jíllñoediaioi. Afe baimo birui monámona caimo llotímie dáinana cai ruifíruiadi, daje izói ua jíllñoeticai. <sup>26</sup>Jaiiai aféruimo ie úrilla uai éniena diga icaíño riire docáitate. Mei íadi birui afémie uafue llote: “Nane afe emódomo dáacaiño éniena riire docáitaiticue, naa caifo ite monáiairi,” daide. <sup>27</sup>Afémie daina “Nane afe emódomo éniena dáacaiño docáitaiticue” Juzíñamui fírairuillaido finóllífue caina daide. Aféruimo nana ie finoca raa, ranítado izírilla izói níraidoite. Afe níraiduado nana nírairede ráaniaina, afémie oni niné táinocaitaite. Mei íadi nírainide ráaniai jaca méidonide; fiébillano zíñona íitiaioi. <sup>28</sup>Ja birui Juzíñamui méidonide illáimana illánomo jaináitagacai. Iemona íena “Tere figura” cai daífíreilli. Afe llezica caimare úrillafuedo mai íemo cai íóbilli. Ua, ñue jacíruioicana ie uáillaimo mai ñue cai cacáreilli. <sup>29</sup>Mei jíi, cai Juzíñamui, irai amena cuarilla izói, nana íaífueredinona jaca zíñona íaioina duere fñoite.

### ¿Nie izói Juzíñamuina íóbitaredicai?

**13** <sup>1</sup>Amatai, mai conímana omoi izíruiíreiri. <sup>2</sup>Daje izói onina bitínona mai dúecaillano ñue caimare uáidori, mei daíí dáríe jíáimana íaioi caimare uáidofírenamona ónonino Juzíñamui abí ímíiaina jofo llínotiaioi.

<sup>3</sup>Iemo Jesumo ínuamona llavécamacimo ñue omoi úbicairi. Ua dájena llavécano izói, mai íaioimo comeci omoi facari, íaioina omoi canóllena. Daje izói duere finoca Jesumo jaináidimacimo, mai omoi ñue comécíiri, mei dani omoi abina jíáimaci duere zefuítarede; íemo bimaci diga daí zéfuitiomoiza. (Dáamacidiomoiza.)

<sup>4</sup>Daa come daje ringona áireia ñuera. Afémie dama ie ai abina onona ñuera. Hima dama ie ai jeta ñuera. Mai bifue íáiñeno ñue omoi fímairi. Mei Juzíñamui nana jíruíredínona izire jícánuano íaioina duere fñoiteza, naa dama áireiñeno ringo diga itínori.

<sup>5</sup>Daje izói omoi comeci ífuenta ñue onoiri. Ucubena aillo jitailla fiénide. Afemona abí omoi rairuiri. Mei jíáífodo ómoimo due jiza ite ráaniairi júfidoñeno caimare uái iri, mei Juzíñamui uafue dáideza: “Ona fáicanocaiñeiticue. Daje izói jaca ona zóofeñeiticue,” daide. <sup>6</sup>Iemona minícana jíjíreñeno daífredicai:

“Juzíñamui cuena canófiredímie; íemona fiени cue finóacadímiena jáciruiñeiticue.”

<sup>7</sup>Iemo mai Juzíñamui uai ómoimo nano fueñe jino llófuetínomo ñue omoi uibóiri, mei ñúeodo ómoína ífódiaioiza. Iaiioimona comuide

ñúefuiaimo, féitañeno mai ñue omoi comécioiri. Afémaci Jesús ícoinia titácaiaioi, mei íadi afémaci fáicanocaiñeno Jesumo ínua izói, afe izói féitañeno mai omoi ínofireiri.

<sup>8</sup>Mei jii, Jesucristo nanómona ie illa izói, ja birui jiáifodo méidoñeno dáamieoicaide. Ua afémie jaca ziiñona dáamieite. <sup>9</sup>Ja birui diga jiáifodo cacaide onina bite ónoñega fieni llófueinafuiái ite. Aféfuiái ñúeomona oni nibéfodo omoi baiítaiacadeza; áfemona abí omoi rairuiri. Juzíñamui cairi dúecaillano cai cánuano cai comeci náirecaitate. Afe ie cai comeci náiretaja ñuera. Mei íadi afe jicana lluaíbiga güille rairuinafuiaina jeire cai óiadi, caina ñue cánoñeite. Daje izói afe uai jeire otñona canóñede.

<sup>10</sup>Jesucristo cai ífomo fécafue Juzíñamuimo caimare cai nabáirillena dani caimo dúide. Nana Judúuaido Juzíñamuimo úriraini, ie jaiái gairíracomo aillo Juzíñamuimo ánozille nfcidogafuiái finódiaioi. Mei íadi afémaci Jesús dibénemo ite cámafuiaina llínonidiaioi.

<sup>11</sup>Judúuaimona comínido Juzíñamuimo úritillaíma dácaaiño naga fimona afe faga rille die Juzíñamui icomo uite. Afe Juzíñamui icomo ite jofoidé ñue rairuícacomo comini íaífue ícoinia díena uite. Mei íadi afe faga rille, comini illácuai jinomo jobáífrediaioi. <sup>12</sup>Afe izói Jesús Jerusalén jinomo duere zefuide, dama ie die tóillado nana comini fiénidífue oni dóllena. Daíí duano íaíoína Juzíñamui íena mamede. <sup>13</sup>Ie jira nana Judúuái Juzíñamuimo ánozille nfcidogafuiaina féitajano, mai dama Jesumo jaca cai ínolli. Ua, daíí íemo caimare cai jaináinamona jílloíticai. Ie meáire duere zéfuilla izói, duere cai zefuíaí, áfena náfueñeno nai caimare íemo jáinaiticaí. <sup>14</sup>Ja bñiemo ñuera méidoñega illano caimo íñede; mei íadi Juzíñamui finoca monamo ite méidonide cai illínomo izire úiñoidicaí, caimare ziiñona ie diga cai nabáirizaillena. <sup>15</sup>Iemo, Jesús caido Juzíñamuimo nahí úriraimana íllamona, mai Jesudo nágaruillai Juzíñamuimo ñúefue cai nitalli. Ua, cai fuemo ite uaido Juzíñamuina caimátaitaredicaí. Cai Ocuíraíma Jesús mámedido cai úriadi, jaca Juzíñamuina ebire íóbitaredicaí. <sup>16</sup>Daje izói nágarui jiáíma canolle ñúefue jeire o úana, mai féitañeno iri. Aféruído jitáidínomo ómoímo ite raana jeruñño fecari; mei aféfuiaina Juzíñamui iere íóbideza.

<sup>17</sup>Omoi illaini llogáuaimo ñue omoi cacáreiri. Aféuai anamo ñue omoi itábicaíri; mei omoi comeci ñue íllena aféllaini nágarui ómoína rairuífirediaíoiza. Ua aféllaini ómoína rairuilla nie izói íadi, afémaci Juzíñamuimo jino llórediaioi. Ie jira íaíoí táijjinana omoi daidóñeno iri; mei jiáifodo ñue íaíoí anamo omoi itábicaíri. Afedo aféllaini Juzíñamui ocuica táijjinana caimare fínoite. Mei íadi afémaci afe táijjinana zúurecana finóadi, figo cánoñegaomoi.

<sup>18</sup>Mai birui caido Juzíñamuimo omoi úriri, afe Juzíñamui cai canólleza, mei cai comeci ífue íáinideza. Mei jii, nágaruillai náganuiaimo

illa dígamié íaiói eróicana ñue jaícina fígomiéna íacadicaí. <sup>19</sup>Ua, cuedo Juzíñamuimo comécido omoi úrilla izire jicádicue, raire meine abido omoi cígimo Juzíñamui cue orélleza.

### **Iraicaiño uáidota ñue ézicinocaillafue**

<sup>20</sup>Ja birui Juzíñamui ñue omoi ézicillena jicádicue; Moo Juzíñamui, comécina uái illafue comínimo fécaitimie. Iemona caí Ocuíraíma Jesuna tíllanomona Juzíñamui meine abido cáatate, mei Jesús ie die tóillado nana caimo ite fiénidífuiaina muiñódeza. Múíñuano zííñona Juzíñamuimo caí nabáirillafue cáiena mamede. Ua, Jesús jamánomo ñuera ovejai úíñoraíma izoide. Afémie ovejai rairuilla izói, caina úíñofirede, comécina uái caí íllena. <sup>21</sup>Afe bie Juzíñamuimo omoi comeci náireillena jicádicue. Ua nana ie ñuera ríinodo omoi coméciaína ñue jaícina caímare náireillena jicádicue. Afe bie cue jicácado ie jitáinafueña ñue comini eróicana fínoitiomoi. Afe llezica Juzíñamui comeci óiacana izói dani caimo zúillena izire íemo jicádicue. Mei daíí jamánomo ebrenafue Jesucrístomo, ninomo fúíñeíténa nitáredicaíza. Mai, daíí íteza.

<sup>22</sup>Amatíai, nana bie ómoímo cue cueda lletárafuiaímo járitaño fia omoi coméciri. Afena izire ómoíena jicádicue, mei bie ómoímo cue cuedaíuái íanorideza. <sup>23</sup>Iemo jíaífueña ómoímo fidítaacadícué. Jae caí ama Timoteo llavéinanomona jae jino zuitaca. Omoi dine nai jáíñeíticuemo, afémie cue illánomo raire dúciadi, nibai daane omoi éroizaibiticoco.

<sup>24</sup>Nana omoi llófueite illáinina cuedo ñue uáidori, naa afénomo ite Jesumo fínotinori. Itáliamona benomo caí bite ámatíai ómoímo uaillai orédiaíoi.

<sup>25</sup>Juzíñamui nana ñue omoi íllena ñue ézicíteza. Mai. Daiítadeza. Jae níie.